

MESYUARAT KETIGA, PENGGAJ KETIGA
PARLIMEN KEEMPAT BELAS
2020

HARI KHAMIS : 10 DISEMBER 2020

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 8 HINGGA NO. 53)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LARRY SOON @ LARRY SNG WEI
SHIEN [JULAU]**

TARIKH SOALAN : 10 DISEMBER 2020 (KHAMIS)

SOALAN

Minta **MENTERI PENDIDIKAN** menyatakan jumlah peruntukan projek penyambungan grid bekalan utama elektrik untuk sekolah-sekolah pedalaman Sarawak selain daripada RM50 juta yang diperuntukkan oleh Kerajaan negeri dan berapa perbelanjaan yang ditanggung akibat penggunaan janakuasa diesel untuk membekalkan elektrik ke sekolah-sekolah tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) telah bekerjasama dengan Kerajaan Negeri Sarawak dalam pelaksanaan Projek Penyambungan Pembekalan Tenaga Elektrik dari Grid Awam. Projek ini adalah untuk memastikan sekolah di kawasan pedalaman Negeri Sarawak mendapat kemudahan bekalan elektrik sepenuhnya. Projek penyambungan grid bekalan utama elektrik untuk sekolah-sekolah pedalaman Sarawak dilaksanakan melalui peruntukan RM50 juta Kerajaan Negeri Sarawak yang melibatkan 121 buah sekolah.

Selain daripada peruntukan tersebut, pihak Jabatan Kerja Raya Malaysia turut melaksanakan kerja-kerja penyambungan elektrik ke 95 buah

NO. SOALAN : 8

sekolah di bawah skop Kontrak Penyelenggaraan dan Pengoperasian Set Janakuasa Diesel. Skop kerja utama Kontrak tersebut adalah menyelenggara set janakuasa diesel di 357 buah sekolah. Perbelanjaan yang ditanggung akibat penggunaan janakuasa diesel untuk membekalkan elektrik ke sekolah-sekolah tersebut adalah sebanyak RM350 juta untuk tempoh selama dua (2) tahun bermula 2 Mac 2020 sehingga 2 Mac 2022.

Untuk makluman Ahli Yang Berhormat, bagi Parlimen Julau, 20 buah sekolah tersenarai dalam Projek Penyambungan Talian Grid Elektrik di bawah Kontrak Penyelenggaraan dan Pengoperasian Set Janakuasa Diesel.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN JUGAH ANAK MUYANG @
TAMBAT [LUBOK ANTU]**

TARIKH : 10 DISEMBER 2020 (KHAMIS)

SOALAN

Minta **MENTERI TENAGA DAN SUMBER ASLI** menyatakan peranan Institut Penyelidikan Perhutanan Malaysia (FRIM) dalam membantu mengekal dan mempelbagaikan hutan negara kawasan Lanjak - Entimau bagi mengawal kemurnian alam sekitar sebagai perlindungan hidupan liar dan kestabilan iklim.

JAWAPAN

Tuan Yang di-Pertua,

1. Institut Penyelidikan Perhutanan Malaysia (FRIM) berperanan untuk menjalankan pelbagai projek penyelidikan bagi menyokong pemeliharaan dan pengurusan hutan secara berkekalan demi kelestarian biodiversiti dan alam sekitar.
2. FRIM telah dilantik oleh Jabatan Hutan Sarawak sebagai Perunding untuk menjalankan Inventori Sumber Hutan di kawasan Heart of Borneo (HoB) Sarawak yang turut meliputi kawasan Santuari Hidupan Liar Lanjak-Entimau (*Lanjak-Entimau Wildlife Sanctuary* - LEWS). Projek tersebut telah bermula pada Oktober 2016 sehingga Disember 2018. Pada masa ini kajian antara FRIM dan Jabatan Hutan Sarawak masih diteruskan melalui pelaksanaan Inventori Sumber Hutan di kawasan tambahan HoB di Sarawak sehingga tahun 2022.
3. Melalui hasil inventori ini, *Lanjak-Entimau Wildlife Sanctuary* telah dikenalpasti sebagai salah satu kawasan hutan yang masih kaya dengan sumber flora serta menyimpan stok karbon yang tertinggi di Sarawak. Melalui projek ini, beberapa cadangan telah diusulkan kepada Kerajaan Negeri Sarawak melalui Jabatan Hutan Sarawak untuk terus memulihara kawasan tersebut bagi menjamin kelestarian hutan serta mengekalkan perkhidmatan ekosistem hutan yang terdapat di kawasan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 10 DISEMBER 2020 [KHAMIS]

SOALAN

Minta **MENTERI PERUMAHAN DAN KERAJAAN TEMPATAN** menyatakan status rancangan pembinaan Balai Bomba di daerah kecil Kemabong untuk membantu menjamin keselamatan penduduk di kawasan ini.

JAWAPAN

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) telah mengkaji keperluan pembinaan balai bomba di daerah Kemabong berdasarkan markah risiko kebakaran daripada kajian *Fire Cover* dan telah membuat permohonan tapak tanah di kawasan tersebut kepada Pejabat Tanah dan Ukur Negeri Sabah yang berkeluasan 2 ekar. Kementerian melalui JBPM telah merancang untuk membina sebuah balai bomba untuk kawasan Kemabong yang akan dimasukkan dalam perancangan RMKe-12 mengikut keutamaan.

2. Pada masa ini, kawasan Kemabong mendapat perlindungan kebakaran daripada Balai Bomba dan Penyelamat (BBP) Tenom, Sabah dengan jarak 32 kilometer yang mengambil masa lebih kurang 36 minit untuk sampai ke kawasan Kemabong.

3. Selain itu, terdapat juga Pasukan Bomba Sukarela (PBS) Mamaitom yang bertindak sebagai *First Responder* dengan jarak 6 kilometer daripada kawasan Kemabong. Keanggotaan PBS ini adalah seramai 20 orang ahli yang dilengkapi dengan sebuah kenderaan Isuzu serta peralatan kebombaan yang disediakan oleh Bahagian Operasi Kebombaan dan Penyelamat, JBPM Negeri Sabah seperti baju api, kasut api, helmet dan pam angkut yang disediakan oleh Balai Bomba dan Penyelamat Tenom.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 10 DISEMBER 2020 (KHAMIS)

SOALAN

TUAN CHE ALIAS BIN HAMID [KEMAMAN] minta **MENTERI KEWANGAN** menyatakan usaha dalam menyelidiki sebarang bentuk laporan salahlaku dan salahguna pihak-pihak tertentu dalam aspek sistem penyampaian insentif dibawah Pakej Rangsangan Ekonomi PRIHATIN dan PENJANA.

JAWAPAN

Tuan Yang di-Pertua,

1. Untuk makluman ahli Yang Berhormat, selain memantau keberkesanan pelaksanaan inisiatif-inisiatif pakej rangsangan ekonomi PRIHATIN dan PENJANA, Kerajaan sentiasa mengambil langkah proaktif bagi memastikan sistem penyampaian inisiatif-inisiatif adalah telus dan tidak dimanipulasi oleh pihak tidak bertanggungjawab. Dalam hal ini, Kerajaan sentiasa bersedia untuk melaporkan sebarang dakwaan salah laku kepada pihak berkuasa seperti Suruhanjaya Pencegahan Rasuah Malaysia (SPRM) dan Polis Diraja Malaysia (PDRM) bagi menyiasat dakwaan tersebut untuk tindakan selanjutnya.

2. Sebagai contoh, bagi Program Subsidi Upah (PSU) yang dikendalikan agensi pelaksana kerajaan iaitu PERKESO, mekanisme berikut telah dilaksanakan bagi memantau pelaksanaan PSU dan mengelakkan penyalahgunaan dana oleh pihak majikan:-

- i. Menyediakan saluran aduan melalui eAduan PSU iaitu sebuah borang aduan dalam talian sebagai platform pertanyaan dan pelaporan sebarang isu berkaitan PSU;
 - ii. Mempamerkan senarai majikan yang telah berjaya memohon secara dalam talian;
 - iii. Menyemak-silang bayaran caruman pekerja di dalam pangkalan data PERKESO untuk memastikan pematuhan syarat;
 - iv. Menggantung dan menyiasat sebarang penipuan atau pelanggaran syarat;
 - v. Menubuhkan mekanisme bagi memulangkan bayaran subsidi upah kepada PERKESO disebabkan oleh pelanggaran syarat;
 - vi. Berunding untuk pembayaran upah dan pematuhan syarat; dan
 - vii. Bekerjasama dengan pihak Suruhanjaya Pencegahan Rasuah Malaysia (SPRM) untuk mendakwa majikan yang melanggar syarat.
3. Setakat ini, sebanyak 5 laporan telah dibuat kepada PDRM/SPRM mengenai penyalahgunaan dana PSU oleh majikan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA 2020, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : DR ONG KIAN MING [BANGI]
TARIKH : 10 DISEMBER 2020 (KHAMIS)

SOALAN

Minta **MENTERI PENGAJIAN TINGGI** menyatakan hasil daripada siasatan terhadap LIM KOK WING UNIVERSITY of CREATIVE TECHNOLOGY (LUCT) atas tuduhan perkauman dan penyalahgunaan kuasa oleh pasukan pengurus kanan ('Senior Management Team'). Apakah tindakan yang diambil oleh pihak Kementerian.

JAWAPAN

Tuan Yang di-Pertua,

KPT sentiasa memberikan perhatian terhadap aduan yang diterima berkaitan dengan Institusi Pendidikan Tinggi Swasta (IPTS) terutama sekali yang melibatkan kepentingan dan kebajikan pelajar. Dalam hal ini, KPT mengambil maklum dan memandang serius berhubung dengan tuduhan wujudnya isu perkauman dan penyalahgunaan kuasa terhadap pengurusan Universiti Teknologi Kreatif LimKokWing (LUCT) yang tular di laman sosial.

Bagi meneliti aduan yang dibangkitkan, KPT pada 10 Ogos 2020 telah menubuhkan Jawatankuasa Khas Siasatan Aduan IPTS-LUCT yang dipengerusikan oleh Ketua Pengarah Pendidikan Tinggi, Jabatan Pendidikan Tinggi (JPT). Memandangkan dapatan awal masih belum mencukupi, pihak Jawatankuasa Khas telah mengarahkan Pasukan Penyiasat agar mendapatkan maklumat dan bukti terkini sebelum sebarang keputusan muktamad dibuat.

Selain itu, KPT telah mengaturkan satu perjumpaan khas dengan pengurusan tertinggi LUCT pada 25 Ogos 2020 berhubung dengan isu yang dibangkitkan. Arahan dan teguran bertulis juga telah dikeluarkan kepada institusi tersebut untuk menambah baik pengurusan pentadbiran institusi dan memberikan peringatan agar isu sebegini tidak berulang. Kebajikan serta hal ehwal pelajar dan juga warga kerjanya hendaklah sentiasa menjadi keutamaan.

Berkaitan dengan isu penyalahgunaan kuasa terhadap pengurusan LUCT khususnya dalam urusan permit mengajar, Jawatankuasa Khas Siasatan Aduan IPTS-LUCT mengambil maklum bahawa mana-mana pegawai IPTS yang layak boleh membuat permohonan permit mengajar mengikut prosedur yang ditetapkan. Permohonan ini lazimnya akan disemak secara terperinci sebelum diluluskan oleh Kementerian. Walau bagaimanapun, sekiranya pihak IPTS didapati menyalahgunakan permit tersebut, tindakan penguatkuasaan akan diambil berdasarkan peruntukan undang-undang dalam Akta Institusi Pendidikan Tinggi Swasta 1996 (Akta 555).

Semakan oleh Jawatankuasa ini mendapati bahawa tindakan telah diambil terhadap tenaga pengajar yang tidak mempunyai permit mengajar di LUCT di bawah Seksyen 81 Akta 555. Susulan ini juga, amaran tegas telah diberikan kepada pihak pengurusan LUCT agar sentiasa mematuhi prosedur serta peraturan pengambilan tenaga pengajar yang berkuat kuasa.

Tuan Yang di-Pertua,

Bagi memastikan pengoperasian IPTS dilaksanakan dengan baik dan mematuhi Akta 555, KPT sentiasa melaksanakan proses penyeliaan dan pemantauan secara berterusan terhadap tadbir urus IPTS. Perkara ini dizahirkan melalui proses pengauditan berkala dan pemeriksaan bersasar melibatkan jawatankuasa audit yang dilantik dan dilaporkan kepada pengurusan tertinggi KPT dari semasa ke semasa. Sesungguhnya, KPT tidak akan berkompromi terhadap mana-mana pihak, khususnya IPTS yang didapati melakukan kesalahan di bawah Akta 555.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 10 DISEMBER 2020 (KHAMIS)

SOALAN

Minta **MENTERI PENDIDIKAN** menyatakan apakah peranan Kementerian dalam merealisasikan inisiatif 'smart classroom' di semua sekolah menengah dalam rancangan Lembaga Kemajuan Tanah Persekutuan (FELDA) sebagaimana yang dinyatakan dalam Pelan Strategik FELDA (Well Formed Outcome).

JAWAPAN

Tuan Yang di-Pertua,

Lembaga Kemajuan Tanah Persekutuan (FELDA) telah mengadakan perkongsian pintar bersama-sama dengan Kementerian Pendidikan Malaysia (KPM) untuk menaik taraf sebanyak 101 buah kelas di sekolah menengah di kawasan FELDA bagi mewujudkan persekitaran yang kondusif untuk pendidikan digital. Inisiatif ini dikenali sebagai FELDA *smart classroom*.

Untuk makluman Ahli Yang Berhormat, dalam melaksanakan FELDA *smart classroom* ini, semua kos untuk menaik taraf dan menyediakan peralatan dan kelengkapan *smart classroom* seperti komputer, akses Internet, perabot dan pendingin hawa dibiayai oleh FELDA. Manakala, KPM bertanggungjawab menyediakan bilik darjah khas untuk pendidikan digital. Selain itu, KPM juga akan memberi latihan kepada guru mengenai penggunaan pelantar pembelajaran digital iaitu *Digital Educational Learning Initiative Malaysia* (DELIMa), sumber pendidikan digital dan khidmat bimbingan yang berterusan bagi meningkatkan kompetensi dalam pengajaran dan pembelajaran secara dalam talian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN CHANG LIH KANG [TANJONG MALIM]

TARIKH : 10 DISEMBER 2020 [KHAMIS]

SOALAN

Minta **MENTERI PERUMAHAN DAN KERAJAAN TEMPATAN** menyatakan berapa jumlah penyewa Program Perumahan Rakyat (PPR) dan Perumahan Awam (PA) di bawah pengurusan KPKT. Apakah langkah-langkah yang dilaksanakan untuk meringankan beban kewangan mereka.

JAWAPAN

Tuan Yang di-Pertua,

1. Untuk makluman Yang Berhormat, buat masa ini terdapat 12 projek Program Perumahan Rakyat (PPR) yang diuruskan oleh Kementerian Perumahan dan Kerajaan tempatan (KPKT). Daripada jumlah tersebut, 2 projek PPR adalah penyewaan secara konvensional yang melibatkan jumlah keseluruhan penyewa seramai 3,168 orang iaitu PPR Lembah Subang 1 (2,798 penyewa) dan Rumah Transit PPR Pinggiran Bukit Jalil (370 penyewa). Manakala 10 lagi projek PPR adalah di bawah Skim Sewa Untuk Dimiliki atau *Rent To Own* (RTO) yang melibatkan jumlah keseluruhan penyewa sebanyak 2,893 orang.

2. Antara langkah yang diambil oleh Kerajaan untuk meringankan beban penyewa PPR adalah dengan mengekalkan kadar sewa yang rendah dan munasabah untuk ditanggung oleh penghuni PPR. Buat masa ini, kadar sewa bulanan termasuk penyenggaraan yang ditetapkan bagi PPR secara sewaan konvensional adalah RM124, Rumah Transit PPR adalah RM250 dan kadar sewa PPR RTO adalah RM255.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATO' MOHD. NIZAR BIN HAJI ZAKARIA
[PARIT]**

TARIKH : 10 DISEMBER 2020 (KHAMIS)

SOALAN

Minta **MENTERI SAINS, TEKNOLOGI DAN INOVASI** menyatakan :

- (a) sejauh manakah Institut Agri-Biotech berperanan dalam menjamin keselamatan bekalan makanan dalam negara; dan
- (b) adakah terdapat sebarang program penyelidikan dan pembangunan (R&D) yang telah dijalankan bagi mencari jalan penyelesaian mengenai isu keselamatan bekalan makanan negara.

JAWAPAN

Tuan Yang di-Pertua,

Untuk makluman Ahli Yang Berhormat,

1. Institut Agro-Bioteknologi, Malaysia (ABI) mempunyai kepakaran dan *proof of concept* dalam bidang R,D,I & C dalam penyelidikan dan penghasilan tanaman bernilai tinggi melalui pembangunan teknologi yang dapat mengawal dan meningkatkan kualiti tanaman. Antara kajian tanaman yang dijalankan adalah rumpai laut, cendawan, padi, tumbuhan herba dan ternakan. Pendekatan bioteknologi yang dijalankan di ABI adalah teknologi pembakaan mikropropagasi kultur tisu, bioinformatik, kejuruteraan genetik, dan bioproses bagi penghasilan formulasi produk bio.

2. Penyelidikan cendawan di ABI tertumpu kepada cendawan-cendawan yang bernilai tinggi dan mempunyai permintaan yang tinggi. Antaranya adalah cendawan susu harimau, shiitake dan cendawan tiram. Penyelidikan cendawan susu harimau adalah di tahap pengkomersilan untuk pasaran farmaseutikal dan makanan. Sebagai permulaan, sebanyak hampir 200kg serbuk cendawan susu harimau dan 450kg tuber cendawan susu harimau telah dihasilkan dan dipasarkan. Produk (tuber & serbuk) yang dihasilkan oleh ABI adalah produk yang mempunyai kualiti yang lebih baik daripada cendawan susu harimau yang liar. Penilaian kualiti sentiasa dijalankan bagi memastikan kualiti produk adalah konsisten.

3. ABI telah berkolaborasi bersama Jabatan Perikanan Malaysia (DOF) dalam usaha memastikan kelestarian bekalan rumpai laut di laut Malaysia. Fasiliti pusat penghasilan benih kultur tisu rumpai laut dan pusat mitigasi bencana telah dibangunkan di Fisheries Research Institute (FRI) di Bukit Malut, Langkawi. ABI telah menjalankan pemindahan teknologi penghasilan benih kultur tisu kepada kakitangan DOF (pegawai pengembangan pertanian), 3 syarikat swasta dan pelajar industri atas konsep Training of Trainers (ToT). Projek ini telah meyumbang kepada 12,000 benih rumpai laut di perairan Langkawi, Kedah dan penghasilan 70 kilogram serbuk rumpai laut. Selain itu, ABI dengan kerjasama bersama pihak MARDI telah menjalankan pemprosesan serbuk rumpai laut, latihan dan bimbingan pembangunan produk makanan seperti kek, biskut, sos, bubur dan sapuan berasaskan rumpai laut kepada usahawan-usahawan IKS yang berpotensi sebagai nilai tambah bagi produk sedia ada syarikat-syarikat tersebut.

4. Pemindahan teknologi daripada hasil R&D dari makmal telah dipindahkan kepada petani dan usahawan melalui projek-projek MOSTI Social Innovation (MSI). Sehingga kini sebanyak 8 projek MSI telah dijalankan dan seramai 474 orang petani dan usahawan telah menerima manfaat daripada projek-projek ini sama ada di Semenanjung dan Sabah. Antara projek-projek tersebut adalah Program Pembangunan Usahawan Desa Dalam Penanaman Cendawan Di Kimanis, Papar, Program Penghasilan Makanan Ternakan Ruminan Kos Rendah dan Mampan Menggunakan Teknologi Silaj oleh Komuniti di Kawasan Padang Terap, Kedah, Program pengeluaran benih kumpulan halia (*Zingiber spp.*) menggunakan teknik tisu kultur dan sistem fertigasi di Keningau,

Ternakan Ikan Patin Dalam Tangki Modular Terkawal di Pahang, Pembangunan sistem fertigasi bagi penanaman tanaman herba *Kaempferia parviflora* secara berskala besar di Pulau Pinang.

5. Melalui R&D, ABI juga telah menjalankan penyelidikan melalui pendekatan bioteknologi bagi penghasilan padi yang rintang terhadap siput gondang. Hasil kajian menunjukkan protein siklotida berpotensi sebagai racun biologi kepada moluska di mana berlaku mortaliti siput sebanyak 20%. Melalui transformasi genetik ini, dijangkakan penghasilan pokok padi varieti baharu dapat dihasilkan yang mempunyai ketahanan terhadap siput gondang dan seterusnya dapat meningkatkan hasil pengeluaran padi di Malaysia.

6. Pemakanan haiwan merupakan komponen penting dalam pertumbuhan dan kesihatan haiwan bagi memastikan peningkatan produktiviti dalam penghasilan haiwan ternakan. Oleh itu, beberapa penyelidikan dan inovasi yang telah dijalankan seperti Silaj untuk haiwan ruminan, probiotik untuk ikan dan ayam, livefeed untuk ikan. Dalam bidang bioteknologi makanan, ABI menjalankan penyelidikan yang mampu meningkatkan kualiti nutrisi makanan melalui proses bio-fortifikasi, bio-ramuan dan makanan berfungsi. Kajian yang dijalankan adalah seperti penyelidikan anti-diabetik daripada Ulam Raja (*Cosmos caudatus*) menggunakan kaedah metabolomik dan kajian anti-hipertensi dari bio-peptida pokok kekacang. ABI juga mempunyai kepakaran dalam analisa makanan seperti keselamatan makanan (*food safety*), logam berat (*heavy metals*) dan pemprosesan makanan melalui teknologi tanpa-haba seperti *High Pressure Processing* dan *Pulse Electric Field*.

7. Sehingga kini, ABI mempunyai 14 jenis produk R&D, perkhidmatan analisis dan 11 *Intellectual Properties* (IP) yang dapat dipasarkan (Lampiran 2). ABI mempunyai aset dalam bentuk modal insan penyelidik-penyelidik yang pakar dalam bidang kajian masing-masing. ABI juga menjalankan hubungan kolaborasi dengan pihak universiti dan institut penyelidikan yang lain dalam menjalankan penyelidikan. Selain itu, ABI juga mempunyai fasiliti/peralatan makmal yang turut digunakan dalam pelbagai penyelidikan oleh kolaborator dan penyelidik luar yang boleh menyumbang kepada jaminan makanan negara. Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB PUAN HAJAH FUZIAH BINTI SALLEH
[KUANTAN]**

TARIKH : 10 DISEMBER 2020 (KHAMIS)

SOALAN

Minta **MENTERI TENAGA DAN SUMBER ASLI** menyatakan apakah definisi tenaga hidro skala besar. Apakah status serta peranan tenaga hidro skala besar dalam strategi pembangunan tenaga boleh baharu (TBB) negara.

JAWAPAN

Tuan Yang di-Pertua,

Untuk makluman Ahli Yang Berhormat,

Dalam perancangan pembekalan elektrik negara, tenaga hidro berskala besar didefinisikan sebagai penjanaan elektrik daripada loji jana kuasa hidro berkapasiti melebihi 30MW. Sehingga suku ketiga tahun 2020, jumlah kapasiti terpasang bagi sumber hidro berskala besar dalam pembekalan elektrik negara adalah sebanyak 5,442MW atau kira-kira 15% daripada jumlah keseluruhan kapasiti terpasang.

Penjanaan elektrik daripada sumber hidro dapat memastikan bekalan elektrik yang berdaya harap pada kos yang lebih rendah berbanding sumber-sumber penjanaan yang lain. Selain itu, proses penjanaan elektrik daripada loji jana kuasa hidro tidak membebaskan gas rumah kaca (GHG) dan sewajarnya diambil kira sebagai Tenaga Boleh

NO. SOALAN : 16

Baharu dalam perancangan pembekalan elektrik negara. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATO' SERI TIONG KING SING
[BINTULU]**

TARIKH : 10 DISEMBER 2020 (KHAMIS)

SOALAN

Dato' Seri Tiong King Sing [Bintulu] minta MENTERI KEWANGAN menyatakan:-

- (a) apakah rasional Kementerian hanya mengehendkan pengagihan Bantuan Sara Hidup (BSH) secara tunai di Bank Simpanan Nasional (BSN) untuk kawasan luar bandar terutamanya Sarawak dan apakah penyelesaian untuk kawasan yang tiada BSN; dan
- (b) apakah pihak Kementerian bercadang menubuhkan unit khas yang bergerak ke kawasan luar bandar untuk membantu dalam pengagihan BSH supaya rakyat tidak perlu menjelajah jauh.

JAWAPAN

Tuan Yang di-Pertua,

1. Bantuan kewangan yang disediakan di bawah Bantuan Sara Hidup (BSH) yang menyasarkan kumpulan pendapatan B40 adalah bagi meringankan kos sara hidup dan meningkatkan kesejahteraan hidup mereka.
2. Bank Simpanan Nasional (BSN) pula merupakan agensi pembayar bagi program BSH berasaskan kepada liputan perkhidmatan perbankan disediakan adalah yang paling luas di seluruh negara merangkumi kawasan bandar, luar bandar dan pedalaman.

3. Bagi penerima BSH yang tidak mempunyai akaun bank dan tinggal di pedalaman Sabah dan Sarawak, pelaksanaan pembayaran secara tunai akan dilaksanakan dan diselaraskan oleh Perbendaharaan Malaysia Sabah (PMSabah) dan Perbendaharaan Malaysia Sarawak (PMSarawak) dengan kerjasama Lembaga Hasil Dalam Negeri Malaysia (LHDNM) dan BSN di samping sokongan daripada Kerajaan Negeri Sabah dan Sarawak.
4. Bagi tahun 2020, program pembayaran secara tunai ini telah memanfaatkan 53,325 penerima di kawasan pedalaman Sabah dan Sarawak melibatkan lokasi-lokasi yang ditetapkan iaitu 10 lokasi di Sabah dan 30 lokasi di Sarawak bagi memudahkan urusan penerima di kawasan pedalaman berkenaan. Sebagai contoh, antara kawasan yang terlibat dalam program berkenaan adalah Pulau Banggi dan Nabawan di Sabah serta Betong dan Song di Sarawak. Bagi mereka yang tidak sempat hadir ke program berkenaan, pembayaran juga boleh dituntut secara tunai di Cawangan BSN mengikut tempoh masa yang ditetapkan.
5. Untuk makluman Yang Berhormat, Kerajaan kekal komited dalam memastikan semua bantuan Kerajaan adalah berkesan dan menepati kumpulan sasar yang ditetapkan terutamanya golongan B40. Kerajaan sedang merangka cadangan untuk menambah baik kaedah pembayaran BSH melalui ATM bergerak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 10 DISEMBER 2020 [KHAMIS]

SOALAN

Minta **MENTERI PERUMAHAN DAN KERAJAAN TEMPATAN** menyatakan membentangkan jumlah projek perumahan terbengkalai di daerah Segamat dan apakah tindakan yang akan diambil oleh pihak Kementerian.

JAWAPAN

Tuan Yang di-Pertua,

1. Untuk makluman Yang Berhormat, bagi Daerah Segamat, terdapat **hanya 1 projek perumahan swasta terbengkalai iaitu di Taman Tunku Abdul Rahman, Segamat** yang berstatus projek statik. Projek statik bermaksud terdapat isu perundangan / tiada hala tuju pemulihan oleh pemaju/pelikuidasi/tuan tanah. Projek ini terdiri daripada 90 unit rumah melibatkan 63 orang pembeli.
2. Kemajuan projek telah terhenti sekitar tahun 2005 disebabkan masalah kewangan syarikat pemaju. Susulan itu, projek telah disahkan sebagai terbengkalai oleh YB Menteri Perumahan dan Kerajaan Tempatan berdasarkan peruntukan Seksyen 11(1)(ca), Akta Pemajuan Perumahan (Kawalan dan Pelesenan) [Akta 118] pada 16 Mac 2012 dengan 50% kemajuan keseluruhan projek semasa disahkan terbengkalai.
3. Syarikat pemaju iaitu Vital Landscape Sdn. Bhd. pula telah dikenakan perintah penggulungan oleh Mahkamah Tinggi Malaya Muar pada 21 September 2015 dan Pegawai Penerima Jabatan Insolvensi Malaysia (Cawangan Muar) telah dilantik sebagai pelikuidasi syarikat pada tarikh yang sama. Halatujua pemulihan projek masih belum dikenal pasti kerana syarikat pemaju telah dikenakan perintah penggulungan.
4. Halatujua pemulihan atau penyelesaian projek ini menghadapi kesukaran disebabkan oleh:
 - (a) Tiada pelikuidasi swasta atau pemaju penyelamat yang ingin mengambil alih projek ini daripada Pegawai Penerima; dan
 - (b) Projek ini didapati kurang berdaya maju (*not viable*) untuk dipulihkan disebabkan kos pemulihan dan kos infrastruktur yang agak tinggi.
5. Pada masa yang sama, pihak Kerajaan tidak dapat memulihkan projek ini melalui dana kerajaan disebabkan projek tersebut tidak berada

dalam kategori keutamaan yang diluluskan oleh Kementerian Kewangan untuk pemulihan projek terbengkalai kerana projek ini berada di bawah kategori rumah kos sederhana dan tinggi (harga melebihi RM70,000). Penggunaan dana kerajaan yang diluluskan pula adalah bagi pemulihan rumah kategori kos rendah dan sederhana rendah sahaja (RM70,000 ke bawah).

6. Namun begitu, Kementerian Perumahan dan Kerajaan Tempatan (KPKT) dan Pegawai Penerima sentiasa mengadakan rundingan dan bekerjasama dengan Pejabat Setiausaha Kerajaan Negeri Johor, Majlis Perbandaran Segamat, bank-bank pembiaya dan para pembeli untuk mengenal pasti kaedah pemulihan atau penyelesaian projek yang terbaik berdasarkan undang-undang dan peraturan yang berkuat kuasa serta memenuhi keperluan di dalam Perjanjian Jual Beli.

7. KPKT juga sentiasa mengadakan sesi perjumpaan dengan pihak pemaju-pemaju penyelamat yang berkeupayaan dan berpengalaman (*white knight*) untuk mengambil alih dan meneruskan pemulihan projek perumahan swasta terbengkalai termasuk projek ini. Sesi perjumpaan yang terkini telah diadakan pada 8 September 2020 tetapi masih belum ada mana-mana pihak yang menyatakan minat untuk melaksanakan pemulihan projek tersebut.

8. Dalam masa yang sama, bagi **membantu meringankan beban para pembeli** yang terbabit dengan projek perumahan swasta terbengkalai, Kementerian turut mengambil inisiatif dengan mengeluarkan surat pengesahan projek perumahan swasta terbengkalai kepada pembiaya akhir (*end-financier*) bagi unit rumah berkaitan. Melalui surat pengesahan ini, para pembeli boleh mendapatkan kemudahan-kemudahan seperti berikut:

- (a) Memohon pertimbangan daripada institusi perbankan bagi sebarang permohonan pengurangan kadar faedah dan penstrukturan semula pinjaman perumahan;
- (b) Memohon pertimbangan daripada Kumpulan Wang Simpanan Pekerja (KWSP) bagi permohonan pengeluaran kali kedua;

(c) Bagi pembeli yang membuat pinjaman perumahan Kerajaan pula, mereka boleh mendapatkan kemudahan dan pertimbangan untuk:

- i. Memohon pinjaman baharu iaitu pinjaman penuh seperti pinjaman pada kali pertama; atau
- ii. Mendapatkan pengecualian pengenaan faedah pinjaman pada kadar 4% sepanjang tempoh projek dipulihkan atau selama 5 tahun (mana-mana yang terdahulu).

9. Walau bagaimanapun, semua perkara di atas adalah tertakluk kepada penilaian institusi pembiaya ke atas peminjam-peminjam berdasarkan merit setiap kes.

10. Untuk makluman Ahli Yang Berhormat, Kerajaan juga telah melanjutkan pengecualian duti setem ke atas perjanjian pinjaman dan surat cara pindah milik kepada pembeli asal projek perumahan swasta terbengkalai sehingga 31 Disember 2020. Inisiatif ini telah diperkenalkan sejak tahun 2013 bagi membantu meringankan bebanan para pembeli yang terbabit dengan projek perumahan swasta terbengkalai.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN NIK MOHAMAD ABDUH BIN
NIK ABDUL AZIZ [BACHOK]**

TARIKH : 10 DISEMBER 2020 (RABU)

SOALAN

TUAN NIK MOHAMAD ABDUH BIN NIK ABDUL AZIZ [BACHOK] minta **MENTERI KOMUNIKASI DAN MULTIMEDIA** menyatakan sejauh mana impak kempen “Kebebasan Bersuara bukan Kebebasan Berbohong” yang dilaksanakan selama tiga bulan ini bermula Julai memandangkan masih berleluasanya kes-kes penyebaran berita palsu.

JAWAPAN

Tuan Yang di-Pertua,

Untuk makluman Ahli Yang Berhormat, bagi memupuk kesedaran serta mendidik masyarakat Malaysia agar tidak mudah terjebak menjadi mangsa virus berita palsu, Kementerian ini secara proaktif telah menjalankan kempen “Kebebasan Bersuara bukan Kebebasan Berbohong” melalui penglibatan pihak media merangkumi awam dan swasta seperti stesen-stesen televisyen dan radio; termasuk media cetak serta media dalam talian.

Kempen ini bertujuan menyeru masyarakat awam termasuklah pengamal media supaya lebih bertanggungjawab dalam menyebarkan atau melaporkan sebarang berita tanpa menyekat kebebasan bersuara. Dimensi baharu dengan aspirasi baharu ini menekankan aspek menghormati kebebasan bersuara dan kebebasan media namun dibatasi dengan nilai-nilai murni yang bersifat sejagat merentasi kaum dan agama.

Melalui kempen ini orang ramai diberi pencerahan mengenai penguatkuasaan dan tindakan undang-undang yang bakal diterima penyebar dan pencipta berita palsu. Mereka turut digalakkan supaya lebih bijak menilai berita-berita yang diterima bagi memastikan sama ada ianya palsu atau sahih. Ini boleh dilakukan dengan menyemak laman-laman web yang berwibawa dan boleh dipercayai seperti Sebenarnya.my.

Kementerian telah bekerjasama dengan beberapa saluran media tempatan utama syarikat akhbar dan penyiaran seperti Media Prima, Maestro, Bernama, Sinar Harian, *The Star*, Utusan Borneo, dan *Sin Chew Daily* bagi menjayakan kempen ini. Beberapa rancangan yang memupuk nilai-nilai moral dalam kalangan masyarakat telah disiarkan sehingga akhir September lalu. Antaranya kandungan yang dikeluarkan termasuklah rancangan temubual bersama tokoh-tokoh masyarakat, program *webinar* bersama pakar komunikasi, laporan berita dan pemakluman *Public Service Announcement* (PSA) di saluran-saluran TV dan juga portal-portal dalam talian. Artikel-artikel bertemakan 'Kebebasan Bersuara Bukan Kebebasan Berbohong' juga telah diterbitkan dalam tempoh tiga (3) bulan tersebut bersama rakan kolaborasi kempen ini seperti Sinar Harian, *The Star*, Utusan Borneo, *Sin Chew Daily*.

Sambutan terhadap kempen ini agak baik dan telah memberikan kesan kepada masyarakat berdasarkan jumlah penonton dan pembaca rakan-rakan media yang bekerjasama dalam menjayakan kempen ini. Jumlah aduan berita atau kandungan palsu yang diterima oleh Suruhanjaya Komunikasi dan Multiimedia Malaysia (SKMM) daripada orang awam bagi bulan Julai (permulaan kempen) adalah sebanyak **179** laporan, namun, pada bulan Ogos ia telah menurun kepada **91** laporan dan sebanyak **78** laporan bagi bulan terakhir kempen tersebut. Sehubungan itu, berdasarkan jumlah aduan berita atau kandungan palsu yang diterima oleh pihak SKMM, maka bolehlah dirumuskan bahawa kempen yang dijalankan sedikit sebanyak telah berjaya meningkatkan tahap kesedaran orang ramai untuk tidak memulakan sebarang berita atau kandungan palsu di media sosial.

Walaupun kempen ini telah berakhir, pihak Kementerian dan SKMM akan meneruskan inisiatif kesedaran serta keupayaan dan pendidikan pengguna atau "*user empowerment and education*" melalui pelbagai program advokasi dan kesedaran di media dan di lapangan sebagai kesinambungan kepada inisiatif sedia ada dalam usaha memupuk kesedaran awam mengenai gejala berita palsu, membudayakan amalan menyemak dan menentukan kesahihan sesuatu berita sebelum dikongsi atau disebarkan, serta membudayakan amalan menyebarkan kebenaran.

Naratif yang akan digunakan ialah dengan bercerita secara konsisten, dengan matlamat akhir supaya orang akan dapat membezakan antara yang benar dengan yang tidak benar, dan yang sahih dan tidak sahih. Usaha untuk menerapkan budaya positif kepada pengguna internet bukanlah sesuatu yang boleh dilakukan dalam jangkamasa yang pendek. Oleh itu, program-program advokasi dan kesedaran seperti Klik Dengan Bijak (KDB), *Malaysian ICT Volunteer* dan Sebarkan Kebenaran akan terus dilaksanakan dalam usaha untuk memupuk nilai-nilai murni dalam masyarakat, khususnya pengguna Internet.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : TUAN AKMAL NASRULLAH BIN MOHD. NASIR
[JOHOR BAHRU]**

TARIKH : 10 DISEMBER 2020 (KHAMIS)

SOALAN

TUAN AKMAL NASRULLAH BIN MOHD. NASIR [JOHOR BAHRU]
minta **MENTERI KEWANGAN** menyatakan kekangan-kekangan yang dihadapi oleh Kerajaan untuk melanjutkan tempoh moratorium walaupun pelbagai pihak telah mencadangkan akan keperluan tersebut bagi meringankan beban ekonomi rakyat.

JAWAPAN

Tuan Yang Di-Pertua,

1. Kerajaan telah memberikan kemudahan moratorium secara menyeluruh ke atas pinjaman bank selama 6 bulan sehingga September 2020 sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Bantuan akan terus diberikan meskipun selepas moratorium secara menyeluruh berakhir.

2. Dengan peralihan kepada bantuan bayaran balik pinjaman secara bersasar pada 1 Oktober 2020, bank terus menawarkan pelanjutan moratorium dan bentuk fleksibiliti bayaran balik pinjaman lain kepada peminjam yang terjejas akibat COVID-19. Bantuan ini disediakan kepada peminjam yang telah kehilangan pekerjaan atau pendapatan mereka terjejas, sama ada individu, isi rumah atau PKS sepanjang tahun 2020 sehingga tahun 2021.

3. Ekoran daripada gelombang ketiga wabak COVID-19 baru-baru ini, Kerajaan juga telah mengumumkan dalam Belanjawan 2021 bahawa bantuan bayaran balik pinjaman bersasar akan terus dilanjutkan kepada golongan B40 yang juga merupakan penerima Bantuan Prihatin Rakyat. Selain itu, perusahaan mikro dengan pinjaman berjumlah sehingga RM150,000 akan turut menikmati bantuan yang serupa. Bagi penerima Bantuan Prihatin Nasional M40 yang memohon pengurangan ansuran pula, bank juga telah bersetuju untuk menerima perisytiharan sendiri pengurangan pendapatan yang dialami akibat pandemik.

Tuan Yang Di-Pertua,

4. Dalam menimbang keperluan untuk melanjutkan moratorium secara menyeluruh, Kerajaan telah mengambil kira kesan yang mungkin timbul akibat pelanjutan berkenaan:

- i. Pertama, institusi perbankan melanjutkan moratorium secara menyeluruh boleh menjejaskan kedudukan mudah tunai dan

pendanaan institusi perbankan. Berdasarkan Tinjauan Kestabilan Kewangan Bank Negara Malaysia baru-baru ini, kos kredit boleh meningkat kepada RM29 bilion pada tahun 2020 dan 2021.

- ii. Kedua, ekonomi yang lestari bergantung pada institusi perbankan yang selamat dan kukuh dan boleh mengantarakan dana daripada penyimpan kepada peminjam dengan cekap.
 - iii. Ketiga, bagi ekonomi secara holistik, pelanjutan moratorium secara menyeluruh tanpa mengambil kira sama ada peminjam memerlukannya atau tidak akan menimbulkan beberapa isu. Jika bank menawarkan pakej yang tidak diperlukan oleh peminjam atau mereka mampu membayar balik pinjaman, ini bermakna sumber yang boleh diberikan kepada mereka yang benar-benar memerlukan bantuan akan berkurang.
 - iv. Dan keempat, bagi peminjam pula, pelanjutan moratorium secara automatik bermaksud meningkatkan tahap hutang peminjam yang akan mengambil masa bayaran balik yang lebih lama, seterusnya meningkatkan kos pinjaman. Pelanjutan juga tidak memberi sebarang manfaat kepada peminjam yang mampu untuk membayar balik pinjaman. Sebaliknya, peminjam sebegini wajar digalakkan untuk membayar balik hutang mereka kerana tindakan itu akan lebih menjimatkan kos pinjaman.
5. Kerajaan sekali lagi ingin memberikan menekankan bahawa bantuan akan diberikan kepada mereka yang memerlukannya dengan bank terus meluluskan hampir kesemua permohonan bantuan. Peminjam hanya perlu menghubungi bank masing-masing.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI AHMAD BIN HAJI MASLAN
(PONTIAN)**

TARIKH : 10 DISEMBER 2020 (KHAMIS)

SOALAN

Minta **MENTERI PERTAHANAN** menyatakan usaha yang dibuat bagi memastikan perairan negara khasnya dan pertahanan negara umumnya berada di tahap tertinggi serta nyatakan bukti-bukti yang peristiwa pencerobohan Tanduo di Sabah bukan sandiwara seperti dinyatakan oleh pihak pembangkang.

JAWAPAN

Tuan Yang di-Pertua,

Usaha-usaha yang dilaksanakan oleh Angkatan Tentera Malaysia (ATM) yang melibatkan Tentera Laut Diraja Malaysia (TLDM) dan Tentera Udara Diraja Malaysia (TUDM) bagi memastikan perairan negara khususnya dan pertahanan negara umumnya berada di tahap tertinggi adalah dengan pelaksanaan operasi-operasi secara berterusan di seluruh perairan negara meliputi Laut China Selatan, Selat Melaka, Perairan Timur Sabah dan Perairan Tenggara Johor.

Operasi-operasi yang dilaksanakan termasuk operasi tunggal (melibatkan satu cabang perkhidmatan) dan operasi gabungan yang melibatkan ketiga-tiga cabang perkhidmatan ATM. Bagi memperkukuhkan lagi kawalan perairan negara kerjasama rondaan bersama negara jiran turut dijalinkan seperti di perairan Selat Melaka di bawah inisiatif Malacca Straits Patrol (MSP) yang melibatkan kerjasama Malaysia, Indonesia, Singapura dan Thailand. Di bawah inisiatif ini kerjasama rondaan terkoordinasi laut yang dikenali Malacca Straits Sea Patrol (MSSP) dan pengawasan ruang udara bersama yang dikenali Eyes In The Sky (EiS) dilaksanakan. Begitu juga di Pantai Timur Sabah turut diwujudkan kerjasama di antara Malaysia, Filipina dan Indonesia di bawah Trilateral Cooperative Arrangement (TCA) yang melibatkan elemen rondaan maritim (Trilateral Maritime Patrol) dan rondaan udara (Trilateral Air Patrol) yang melibatkan kerjasama Tentera Laut dan Tentera Udara dari ketiga-tiga buah negara berkenaan.

Bagi pencerobohan Tanduo, suka saya tegaskan kejadian ini adalah satu kejadian yang benar-benar berlaku dan bukannya suatu sandiwara yang menjadi rekaan semata-mata seperti tuduhan ahli politik pembangkang. Pencerobohan di Kg Tanduo, Felda Sahabat 17, Lahad Datu, Sabah yang didalangi oleh satu kumpulan orang bersenjata, dikenali sebagai Tentera Diraja Kesultanan Sulu bermula pada 12 Februari 2013, telah mengorbankan seramai 10 anggota keselamatan (8 polis dan 2 anggota tentera).

NO. SOALAN : 21

Berdasarkan maklumat dari Kementerian Dalam Negeri (KDN) beberapa kejadian pencerobohan dan keganasan yang telah dilakukan oleh kumpulan ini telah dilaporkan kepada pihak Polis Diraja Malaysia (PDRM). Sebagai contohnya, bagi Cenderawasih Repot: 124/13, siasatan telah dijalankan di bawah Seksyen 130C (1)(a) Kanun Keseksaan (Melakukan Perbuatan Pengganas), di mana seramai 4 orang Pegawai Kanan Polis/Anggota telah terkorban di dalam pertempuran tersebut. Di dalam kes ini, seramai 19 Orang Kena Tuduh (OKT) telah didakwa di Mahkamah dan seramai 4 orang telah dijatuhi hukuman gantung sampai mati, manakala seorang dihukum penjara sepanjang hayat.

Manakala bagi Semporna Repot: 1150/13, siasatan telah dijalankan di bawah Seksyen 130C (1)(a) Kanun Keseksaan (Melakukan Perbuatan Pengganas), di mana seramai 6 orang Pegawai Kanan Polis/Anggota telah terkorban. Bagi kes ini pihak mahkamah telah menjatuhkan hukuman gantung sampai mati kepada 4 orang penceroboh dan seorang lagi dihukum penjara 10 tahun.

Sehubungan itu, ianya amat jelas bahawa kes pencerobohan ini bukanlah suatu sandiwara kerana ianya melibatkan banyak nyawa terutamanya anggota keselamatan yang telah terkorban dan tercedera demi mempertahankan kedaulatan negara.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : TUAN RAMKARPAL SINGH
A/L KARPAL SINGH [BUKIT GELUGOR]**

TARIKH : 10 DISEMBER 2020 (KHAMIS)

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **MENTERI KEWANGAN** menyatakan sama ada moratorium bayaran balik pinjaman institusi kewangan akan diperkenalkan semula susulan Perintah Kawalan Pergerakan Bersyarat (PKPB) yang dilaksanakan baru-baru ini di beberapa kawasan utama dan sekiranya tidak, apakah langkah-langkah yang diambil oleh Kerajaan untuk membantu peminjam yang terjejas akibat PKPB tersebut.

JAWAPAN

Tuan Yang Di-Pertua,

1. Kerajaan telah memberikan kemudahan moratorium secara menyeluruh ke atas pinjaman bank selama 6 bulan sehingga September 2020 sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Bantuan akan terus diberikan meskipun selepas moratorium secara menyeluruh berakhir.
2. Dengan peralihan kepada bantuan bayaran balik pinjaman secara bersasar pada 1 Oktober 2020, bank terus menawarkan pelanjutan moratorium dan bentuk fleksibiliti bayaran balik pinjaman lain kepada peminjam yang terjejas akibat COVID-19. Bantuan ini disediakan kepada peminjam yang telah kehilangan pekerjaan atau pendapatan mereka terjejas, sama ada individu, isi rumah atau PKS sepanjang tahun 2020 sehingga tahun 2021.
3. Ekoran daripada gelombang ketiga wabak COVID-19 baru-baru ini, Kerajaan juga telah mengumumkan dalam Belanjawan 2021 bahawa bantuan bayaran balik pinjaman bersasar akan terus dilanjutkan kepada golongan B40 yang juga merupakan penerima Bantuan Prihatin Rakyat. Selain itu, perusahaan mikro dengan pinjaman berjumlah sehingga RM150,000 akan turut menikmati bantuan yang serupa.
4. Peminjam dari golongan B40 akan diberi pilihan sama ada menangguhkan bayaran balik pinjaman selama tiga bulan atau mengurangkan bayaran ansuran bulanan mereka sebanyak 50% dalam enam bulan bermula Disember 2020. Kelulusan diberikan secara automatik setelah mereka menyatakan pilihan mereka kepada bank. Peminjam yang memerlukan bantuan hanya perlu memaklumkan kepada bank masing-masing melalui pelbagai saluran mudah yang telah disediakan seperti perbankan internet, secara dalam talian atau menerusi Agensi Kaunseling dan Pengurusan Kredit.

Tuan Yang Di-Pertua,

5. Bagi memastikan bantuan dapat diberikan dengan segera kepada mereka yang memerlukannya, proses permohonan telah dipermudahkan dan diringkaskan. Dalam kebanyakan keadaan, bank hanya menghendaki peminjam mengemukakan penyata bank terkini atau mengisytiharkan bahawa pendapatan mereka telah terjejas akibat sekatan pergerakan. Bagi penerima Bantuan Prihatin Nasional M40 yang memohon pengurangan ansuran mereka, bank juga telah bersetuju untuk menerima perisytiharan sendiri pengurangan pendapatan yang dialami akibat pandemik.

6. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman terus disediakan kepada mereka yang terjejas. Mereka hanya perlu menghubungi bank masing-masing.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : DATO' SYED ABU HUSSIN BIN HAFIZ
SYED ABDUL FASAL [BUKIT GANTANG]
TARIKH : 10 DISEMBER 2020 (KHAMIS)

SOALAN

Minta **MENTERI PENGAJIAN TINGGI** menyatakan adakah Program MyBrain15 yang diumumkan diteruskan mengguna pakai kaedah perlaksanaan seperti sebelum ini atau kaedah baharu. Bilakah permohonan baharu akan dibuka oleh Kementerian dan target bilangan permohonan mengikut kategori, iaitu pengajian di peringkat Sarjana dan Doktor Falsafah?

JAWAPAN

Tuan Yang di-Pertua,

Program MyBrain15 telah mula dilaksanakan oleh Kementerian Pengajian Tinggi (KPT) pada 1 Disember 2010 di bawah Rancangan Malaysia Kesepuluh (RMKe-10) dan diteruskan pelaksanaannya dalam Rancangan Malaysia Kesebelas (RMKe-11). Sepanjang tempoh tersebut, Program MyBrain15 telah berjaya menaja seramai 56,910 orang pelajar untuk mengikuti program di peringkat pascasiszawah. Daripada jumlah tersebut, sehingga 8 Disember 2020, seramai 31,725 atau 55.75 peratus graduan telah berjaya menamatkan pengajian pasca siswazah.

Kajian Impak MyBrain (2011 – 2015) yang dilaksanakan oleh Majlis Dekan Pengajian Siswazah UA mendapati bahawa program ini telah memberikan impak yang positif serta signifikan kepada peningkatan kebolehpasaran graduan, perkembangan kerjaya dan peningkatan taraf hidup mereka. Berdasarkan situasi ini, KPT telah mencadangkan supaya Program MyBrain15 ini dijadikan sebagai satu daripada program berimpak tinggi KPT di bawah Rancangan Malaysia Kedua Belas (RMKe-12, 2021 – 2025). KPT masih dalam perbincangan dengan pihak Unit Perancang Ekonomi (EPU) agar cadangan ini dapat dipertimbangkan pelaksanaannya dalam Rolling Plan Kedua RMKe-12.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN RUBIAH BINTI HAJI WANG
[KOTA SAMARAHAN]**

TARIKH : 10 DISEMBER 2020 (KHAMIS)

SOALAN

Minta **MENTERI PENDIDIKAN** menyatakan memperincikan keadaan semasa pendidikan rendah dan menengah negara masa kini termasuklah usaha memenuhi keperluan silibus, pengukuran pencapaian akademik dan aktiviti kokurikulum.

JAWAPAN

Tuan Yang di-Pertua,

Pandemik COVID-19 memberi kesan yang cukup mendalam kepada seluruh rakyat. Khusus bagi sektor pendidikan, sekolah terpaksa ditutup dan menyebabkan sesi pengajaran dan pembelajaran (PdP) secara bersemuka menjadi lebih singkat. Kementerian Pendidikan Malaysia (KPM) sentiasa berusaha untuk memastikan PdP terus dilaksanakan agar semua murid tidak ketinggalan dan dapat mengikuti pembelajaran dalam keadaan selamat. KPM melaksanakan beberapa pendekatan dalam memenuhi keperluan silibus, pengukuran pencapaian akademik dan aktiviti kokurikulum mengikut kesesuaian.

Dalam tempoh sekolah ditutup, KPM berusaha menyediakan akses pembelajaran kepada murid melalui kaedah *Home-based Learning* mengikut kesesuaian guru dan murid. Oleh itu, KPM telah menyediakan Manual Pengajaran dan Pembelajaran di Rumah (PdPR) sebagai panduan kepada guru dalam melaksanakan PdPR secara berstruktur dan terancang supaya murid dapat mengikuti pembelajaran di rumah secara optimum. Manual PdPR ini meliputi pendekatan secara dalam talian (*online*), luar talian (*offline*) dan *off-site* sama ada menggunakan modul pembelajaran atau pembelajaran berasaskan projek.

KPM juga sentiasa berusaha untuk memastikan semua murid mendapat akses pembelajaran. Bagi membantu murid yang tidak mempunyai akses internet atau peranti yang sesuai, guru mengambil inisiatif melaksanakan PdP melalui serahan bahan pembelajaran kepada murid mengikut kesesuaian. Murid juga boleh menggunakan buku teks cetak sebagai bahan rujukan, penyediaan nota, membuat rumusan atau melukis sesuatu konsep. Manakala buku aktiviti pula boleh digunakan untuk membuat latihan ulangkaji. Guru mentaksir murid secara berterusan mengikut kesesuaian dan melaksanakan intervensi mengikut tahap dan keupayaan murid.

Selain daripada itu, PdP turut dilaksanakan melalui siaran TV Pendidikan. KPM telah memperkenalkan semula TV Pendidikan secara terrestrial bermula pada 6 April 2020. Inisiatif ini adalah untuk membantu

murid yang tidak mendapat akses kepada internet atau tidak mempunyai peranti untuk mengikuti pembelajaran di rumah. Keseluruhan siaran TV Pendidikan berjumlah sembilan (9) jam sehari, iaitu dua (2) jam di TV Okey RTM, empat (4) jam di Tutor TV Astro dan tiga (3) jam di saluran NTV7.

Bagi murid yang mengikuti PdP di rumah dan mempunyai peranti serta akses internet pula, KPM menyediakan kemudahan pembelajaran dalam talian melalui platform seperti berikut:

- a) Pelantar pembelajaran digital, iaitu Digital Education Learning Initiative Malaysia (DELIMa). Melalui pelantar ini, murid dan guru boleh akses kepada aplikasi seperti Google Classroom dan Google Meet, Microsoft 365, Apple Teacher Learning Centre, buku teks digital, video PdP dan kuiz;
- b) Koleksi video pendidikan melalui pelantar EduwebTV dan CikgooTube bagi perkongsian koleksi video daya usaha kreativiti guru untuk PdP; dan
- c) Program dan aktiviti seperti kelas digital (*e-class*) untuk murid.

Untuk makluman Ahli Yang Berhormat, dalam usaha untuk memastikan murid terus mendapat pengetahuan, kemahiran dan nilai yang diperlukan untuk kelangsungan pembelajaran, KPM telah melaksanakan penjajaran kurikulum untuk semua mata pelajaran berdasarkan kurikulum sedia ada kecuali untuk murid tingkatan lima. Penjajaran ini melibatkan penyusunan semula kandungan, pedagogi dan pentaksiran berdasarkan hasil pembelajaran yang dihasratkan.

Melalui penjajaran kurikulum ini, guru boleh merancang pengajaran dan pembelajaran dengan melaksanakan kaedah pembelajaran teradun (*blended learning*). Pembelajaran teradun melibatkan gabungan teknik pengajaran bersemuka di dalam bilik darjah atau pembelajaran di rumah yang dirancang secara berstruktur. Bagi pentaksiran murid, kaedah pentaksiran telah diselaraskan semula agar bersesuaian dengan keadaan PdP semasa. Ujian Penilaian Sekolah Rendah (UPSR) dan Penilaian Tingkatan 3 (PT3) tahun 2020 telah dibatalkan dan murid akan

dinilai dengan kaedah penilaian berdasarkan Pentaksiran Bilik Darjah (PBD) yang juga merupakan sebahagian daripada Pentaksiran Berasaskan Sekolah (PBS).

Bagi aktiviti sukan dan kokurikulum pula, KPM telah memutuskan untuk menangguhkan pelaksanaan semua aktiviti sukan dan kokurikulum yang melibatkan murid dan guru secara bersemuka. Program/aktiviti hanya dijalankan secara dalam talian dengan menggunakan platform yang bersesuaian bagi membolehkan interaksi dua hala di antara guru dan murid.

KPM juga telah menjadualkan semula tarikh peperiksaan Sijil Pelajaran Malaysia (SPM), Sijil Vokasional Malaysia (SVM), Sijil Tinggi Agama Malaysia (STAM) dan Sijil Tinggi Persekolahan Malaysia (STPM). Dengan pindaan tarikh peperiksaan awam ini, calon akan mempunyai masa yang lebih panjang untuk membuat persediaan rapi bagi menghadapi peperiksaan. Selain daripada itu, ianya juga memberi lebih masa kepada mereka untuk mengikuti pembelajaran secara bersemuka apabila sekolah dibuka semula pada 20 Januari 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA 2020, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : DR. NIK MUHAMMAD ZAWAWI BIN HAJI
SALLEH [PASIR PUTEH]
TARIKH : 10 DISEMBER 2020 (KHAMIS)

SOALAN

Minta **MENTERI PENGAJIAN TINGGI** menyatakan pencapaian pelaksanaan program Pelan Jana Semula Ekonomi Negara (PENJANA) – Program Kemajuan Kerjaya Kementerian Pengajian Tinggi (KPT-CAP) serta adakah mendapat sambutan daripada graduan dan kemampuan dalam mengatasi kadar pengangguran yang semakin meningkat.

JAWAPAN

Tuan Yang di-Pertua,

Kerajaan telah memperkenalkan inisiatif Pelan Jana Semula Ekonomi Negara atau PENJANA sebagai langkah rangsangan untuk menangani situasi ekonomi semasa dan meringankan beban yang ditanggung oleh rakyat. Terdapat 40 inisiatif bernilai RM35 bilion yang diperkenalkan di bawah PENJANA. Daripada jumlah ini, KPT telah diperuntukkan sebanyak RM100 juta bagi tujuan meningkatkan kebolehpasaran graduan di bawah program dengan izin, *career advancement* atau PENJANA KPT-CAP.

Sehingga 7 Disember 2020, sebanyak 87 program telah diluluskan untuk dilaksanakan melibatkan sinergi dengan 154 buah syarikat penyedia latihan atau syarikat yang mengeluarkan *Letter of Commitment (LOC)* sebagai jaminan penempatan pekerjaan kepada graduan selepas latihan. Berdasarkan bilangan program yang telah diluluskan tersebut, seramai 7,596 graduan dijangka mendapat manfaat. Daripada jumlah ini, pecahan mengikut bidang program adalah seperti yang berikut:

- (i) Program *Place and Train* – sejumlah 6,296 graduan dijangka akan mendapat penempatan pekerjaan sebaik sahaja berjaya menamatkan latihan;
- (ii) Program Keusahawan – seramai 1,010 graduan yang berjaya menamatkan latihan bakal ditawarkan pembiayaan perniagaan sekiranya memenuhi syarat yang ditetapkan; dan
- (iii) Program *gig economy* – seramai 290 orang peserta akan dibimbing untuk menjana pendapatan sendiri secara *freelancing* sebaik sahaja menamatkan latihan.

Usaha ini merupakan sebahagian daripada inisiatif yang dilaksanakan oleh KPT dalam meningkatkan kebolehpasaran graduan. Terdapat juga usaha-usaha lain yang diperkenalkan. Antaranya adalah KPT dengan kerjasama Pertubuhan Kebajikan Sosial (PERKESO) turut

melaksanakan program padanan pekerjaan kepada graduan. Tumpuan juga diberikan kepada usaha untuk menggalakkan pelajar terlibat dalam bidang keusahawanan semasa dalam tempoh pengajian lagi.

Malah KPT komited menyediakan ekosistem untuk menyokong aktiviti keusahawanan di IPT dengan memperkenalkan skim pembiayaan mikro KPT-MEDAC Siswapreneur. KPT turut bekerjasama dengan Perbadanan Usahawan Nasional Berhad (PUNB) menganjurkan program EntrepreneurMOHE@PUNB yang merupakan program latihan jangka pendek yang memberikan penekanan kepada kemahiran pengurusan; bimbingan teknikal bagi Pemasaran Digital; serta BizKonsultansi berbentuk khidmat nasihat berkaitan perniagaan daripada PUNB.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN WONG KAH WOY
[IPOH TIMUR]**

TARIKH : 10 DISEMBER 2020 (KHAMIS)

SOALAN

Minta **MENTERI TENAGA DAN SUMBER ASLI** menyatakan prestasi pencapaian NEM 2.0 setakat ini dan sama ada program NEM 2.0 ini akan dilanjutkan apabila tamat tempohnya pada 31 Disember 2020.

JAWAPAN

Tuan Yang di-Pertua,

Untuk makluman Ahli Yang Berhormat,

Kesemua kuota berjumlah 500MW di bawah Program NEM 2.0 telah habis diagihkan pada penghujung bulan November 2020, lebih awal daripada tarikh akhir program ini iaitu pada 31 Disember 2020. Seperti yang telah saya maklumkan di dalam dewan yang mulia ini pada 2 Disember 2020, Kementerian saya akan membuat pengumuman mengenainya dalam waktu terdekat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN NOOR AMIN BIN AHMAD [KANGAR]

TARIKH : 10 DISEMBER 2020 (KHAMIS)

SOALAN

TUAN NOOR AMIN BIN AHMAD [KANGAR] minta **MENTERI KEWANGAN** menyatakan sejauh mana kutipan hasil Kerajaan terjejas sepanjang tempoh pelaksanaan Perintah Kawalan Pergerakan (PKP) dari Mac 2020 sehingga akhir suku ketiga (akhir September) 2020.

JAWAPAN

Tuan Yang di-Pertua,

1. Semasa pembentangan Belanjawan 2020, Kerajaan telah mengumumkan unjuran jumlah hasil Kerajaan Persekutuan bagi tahun 2020 sebanyak RM244.5 bilion dengan andaian harga minyak mentah dunia Brent USD62 setong. Namun, krisis pandemik COVID-19 telah memberi impak yang besar kepada kedudukan kewangan Kerajaan Persekutuan. Sehubungan itu, anggaran hasil dijangka mengalami pengurangan sekitar 18%.

2. Pengurangan tersebut disebabkan oleh pendapatan perniagaan yang lebih rendah kerana aktiviti ekonomi yang perlahan selaras dengan kawalan pergerakan dalam negara dan di peringkat global serta tindakan pencegahan. Di samping itu, pengurangan kutipan hasil sebahagiannya disebabkan oleh pengumuman beberapa langkah cukai di bawah pakej rangsangan ekonomi, termasuklah penangguhan bayaran cukai untuk semua perniagaan dalam sektor pelancongan sehingga Disember 2020 dan penundaan bayaran cukai dari April hingga Jun 2020 untuk perusahaan kecil dan sederhana (PKS).

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN LARRY SOON @ LARRY SNG
WEI SHIEN [JULAU]**

TARIKH : 10 DISEMBER 2020 (KHAMIS)

SOALAN

YB TUAN LARRY SOON @ LARRY SNG WEI SHIEN [JULAU] minta **MENTERI TENAGA DAN SUMBER ASLI** menyatakan bilangan rumah yang mendapat bekalan elektrik menurut negeri dan usaha terkini Kementerian memastikan bekalan elektrik untuk setiap rumah di Sarawak terutama sekali di kawasan pedalaman.

JAWAPAN

Tuan Yang Dipertua,

Untuk Makluman Ahli Yang Berhormat,

1. Berkaitan bilangan rumah yang mendapat bekalan elektrik sehingga September 2020, sebanyak 8,795,900 rumah di Malaysia telah mendapat bekalan elektrik dengan pecahan berikut:

- (i) 7,674,401 rumah di Semenanjung;
- (ii) 528,020 rumah di Sabah; dan
- (iii) 593,479 rumah di Sarawak.

2. Dalam usaha memastikan bekalan elektrik untuk setiap rumah di Sarawak terutama sekali kawasan pedalaman, Kerajaan Persekutuan melalui Kementerian Pembangunan Luar Bandar KPLB dengan kerjasama Kerajaan Negeri Sarawak melalui Kementerian Utiliti Sarawak (KUS) dan Sarawak Energy Berhad (SEB) akan meneruskan pelaksanaan projek-projek bekalan elektrik luar bandar sama ada melalui penyambungan talian grid atau kaedah alternatif seperti solar, solar hybrid dan hidro bagi kawasan pedalaman.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN AWANG HUSAINI BIN SAHARI
[PUTATAN]**

TARIKH : 10 DISEMBER 2020 (KHAMIS)

SOALAN

TUAN AWANG HUSAINI BIN SAHARI [PUTATAN] minta **MENTERI TENAGA DAN SUMBER ASLI** menyatakan apakah perkembangan terakhir mengenai penyerahan semula SESB kepada Kerajaan Negeri Sabah sebagaimana yang telah dipersetujui sebelum ini.

JAWAPAN

Tuan Yang di-Pertua,

Untuk makluman Ahli Yang Berhormat,

1. Kerajaan Persekutuan komited untuk meneruskan penyerahan kuasa pembekalan elektrik dan Sabah Electricity Sdn. Bhd. (SESB) kepada Kerajaan Negeri Sabah dan akan memulakan rundingan dengan Kerajaan Negeri Sabah yang baharu dibentuk.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 10 DISEMBER 2020 (KHAMIS)

SOALAN

DATO' NGEH KOO HAM [BERUAS] minta **MENTERI KEWANGAN** menyatakan jumlah hutang dan liabiliti lain (secara berasingan) Kerajaan pada akhir tahun 2017, 2018, 2019, pada akhir bulan Februari 2020 dan jumlah pada masa terkini.

JAWAPAN

Tuan Yang di-Pertua,

1. Selain daripada hutang Kerajaan Persekutuan, Kerajaan juga menanggung komitmen lain termasuk komitmen jaminan iaitu tanggungan hutang syarikat berkaitan Kerajaan untuk pelaksanaan pelbagai projek infrastruktur dan utiliti awam, hutang syarikat 1Malaysia Development Berhad (1MDB) serta liabiliti kewangan lain yang meliputi projek kerjasama awam swasta (PPP) dan projek di bawah inisiatif pembiayaan swasta (PFI) dan PBLT Sdn. Bhd. Dengan mengambil kira kesemua tanggungan ini, secara keseluruhannya pendedahan hutang dan liabiliti Kerajaan dianggarkan berjumlah RM1,257 bilion.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : PUAN YEO BEE YIN [BAKRI]

TARIKH : 10 DISEMBER 2020 (KHAMIS)

SOALAN

Minta **MENTERI TENAGA DAN SUMBER ASLI** menyatakan pecahan sumber dana yang digunakan untuk Bantuan Prihatin Elektrik. Berapakah dana dari Kumpulan Wang Industri Elektrik (KWIE) yang digunakan dan baki dana KWIE.

JAWAPAN

Tuan Yang di-Pertua, Untuk makluman Ahli Yang Berhormat,

1. Bantuan Prihatin Elektrik (BPE) yang diumumkan pada 20 Jun 2020 adalah merupakan pemberian diskaun bil elektrik sehingga RM231 atau RM77 sebulan bagi tempoh penggunaan dari April hingga Jun 2020 kepada 7.66 juta pengguna domestik. Selain itu, BPE turut memberikan diskaun tambahan 8% kepada pengguna yang menggunakan elektrik dalam julat 601kWj sehingga 900kWj dari 1 April 2020 hingga 30 September 2020.
2. Kos pemberian BPE adalah sebanyak RM1,061 juta. Pecahan sumber dana yang terlibat adalah RM701 juta daripada dana Kumpulan Wang Industri Elektrik (KWIE), RM260 juta daripada Kementerian Kewangan, dan RM100 juta daripada Tenaga Nasional Berhad.
3. Baki dana KWIE pada tahun 2020 setelah mengambil kira semua komitmen adalah dianggarkan berjumlah RM129.24 juta.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATO' JOHARI BIN ABDUL (SUNGAI PETANI)

TARIKH : 10 DISEMBER 2020 (KHAMIS)

SOALAN

Minta **MENTERI PERTAHANAN** menyatakan adakan Kementerian bercadang untuk memperbanyakkan kedai PERNAMA agar dapat menjual barang dengan harga yang murah kepada anggota tentera dan bekas anggota tentera di seluruh negara.

JAWAPAN

Tuan Yang di-Pertua,

Operasi kedai PERNAMA bermula sejak tahun 1983 dengan jumlah kedai sebanyak 35 buah sahaja. Kini PERNAMA mempunyai 97 kedai di seluruh Malaysia melalui beberapa format seperti Kompleks, lamaniaga dan kedai mudahan mengikut saiz pasaran di sesebuah kem tersebut. PERNAMA juga menguruskan lebih 500 lot-lot niaga di bangunan kepunyaan kerajaan dan di dalam premis PERNAMA.

Cadangan pembukaan kedai-kedai PERNAMA yang baharu adalah tertakluk kepada keperluan setempat dan kajian pasaran.

PERNAMA berhasrat untuk menambah bilangan kedai bukan sahaja di dalam kem-kem tentera malah merancang untuk membuka kedai-kedai PERNAMA di luar kem. Ini bertujuan memudahkan veteran ATM mendapat produk dan perkhidmatan PERNAMA tanpa perlu memasuki kawasan kem. Perancangan sedang dilakukan untuk membangunkan rangkaian kedai runcit dengan jenama PERNAMA *Exchange* (PNX) bagi kedai-kedai yang beroperasi di luar kem melalui rancangan lima tahun PERNAMA 2021 - 2025. Kedai-kedai ini bakal beroperasi dengan konsep "*Company Own Dealer Operate* (CODO)" yang akan memberi peluang kepada veteran untuk mengendalikan kedai-kedai tersebut di kawasan penempatan veteran ATM sendiri.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : TUAN STEVEN CHOONG SHIAU YOON
[TEBRAU]**

TARIKH : 10 DISEMBER 2020 (KHAMIS)

SOALAN

TUAN STEVEN CHOONG SHIAU YOON [TEBRAU] minta **MENTERI KEWANGAN** menyatakan apa sebabnya Kerajaan tidak akan suntik dana lagi pada MAS dan apa akan jadi pada MAS tanpa suntikan dana lagi.

JAWAPAN

1. Tuan Yang Dipertua, selari dengan pelaksanaan Pelan Pemulihan Malaysian Airline System Bhd (MAS) yang bertujuan menstruktur semula dan memulihkan operasi syarikat penerbangan nasional, Malaysia Airlines Berhad (MAB) telah ditubuhkan pada 7 November 2014. Penubuhan MAB bertujuan untuk mengambil alih operasi, aset dan liabiliti syarikat MAS. MAB seterusnya diletakkan di bawah Malaysia Aviation Group Berhad (MAGB) yang dimiliki sepenuhnya oleh Khazanah Nasional Berhad (Khazanah).
2. Memandangkan Kerajaan tidak mempunyai sebarang pegangan saham dalam MAGB dan MAB, sebarang cadangan pemulihan dan penstrukturan syarikat adalah tertakluk kepada pertimbangan dan kelulusan Lembaga Pengarah Khazanah, selaku pemegang saham tunggal syarikat.
3. Sehingga kini, Khazanah telah menyuntik kira-kira RM28 bilion ke dalam syarikat penerbangan tersebut manakala jumlah liabiliti MAGB pada masa ini yang akan disusun semula adalah dianggarkan sebanyak RM16 bilion. Prestasi kewangan MAGB antara tahun 2015 hingga 2018 adalah seperti berikut:

Tahun	Keuntungan/ (Kerugian) - RM
2015	(1.1b)
2016	(0.7b)
2017	(1.2b)
2018	(1.3 b)

4. Setakat 31 Ogos 2020, jumlah kecairan yang dimiliki oleh Kumpulan MAGB adalah kira-kira RM366 juta selain kira-kira RM578 juta yang tersedia untuk digunakan daripada dana yang diperuntukkan oleh Khazanah.

5. Kesan COVID-19 terhadap industri penerbangan secara global adalah amat buruk dan Malaysia Airlines tidak terkecuali daripada menerima impak daripada penularan pandemik ini. Malaysia Airlines kini beroperasi dengan kira-kira 75% daripada pesawatnya tidak dapat diterbangkan akibat sekatan perjalanan, dan turut menyaksikan kapasiti dan pendapatannya terjejas.

6. Bagi mengatasi masalah kewangan MAGB dan MAB, Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut. Proses penstrukturan semula turut melibatkan perundingan dengan pihak pemiutang dan pajakan pesawat.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 10 DISEMBER 2020 (KHAMIS)

SOALAN

Minta **MENTERI PENDIDIKAN** menyatakan perkembangan usaha Kementerian dalam penerapan kurikulum berkaitan meningkatkan kesedaran pelajar sebagai persediaan menjadi pengundi.

JAWAPAN

Tuan Yang di-Pertua,

Untuk makluman Ahli Yang Berhormat, usaha meningkatkan kesedaran murid sebagai persediaan menjadi pengundi telah dilaksanakan melalui Kurikulum Standard Sekolah Rendah (KSSR) dan Kurikulum Standard Sekolah Menengah (KSSM), sama ada secara eksplisit atau sisipan mulai tahun 2017. Perkara ini selaras dengan matlamat pendidikan negara yang berdasarkan Falsafah Pendidikan Kebangsaan dan berteraskan Rukun Negara.

Kementerian Pendidikan Malaysia (KPM) berpandangan bahawa melalui pelaksanaan kurikulum kebangsaan, semua murid akan memperolehi pengetahuan, kemahiran dan nilai yang boleh diaplikasikan dalam kehidupan untuk membentuk sikap bertanggungjawab dan hormat menghormati. Dalam hal ini, kandungan mata pelajaran Sejarah, Pendidikan Moral serta pelaksanaan elemen Pendidikan Sivik secara sisipan dalam mata pelajaran Bahasa Melayu, Bahasa Inggeris dan

Pendidikan Islam menjurus kepada persediaan murid untuk menjadi pengundi yang tahu hak dan tanggungjawab mereka. Melalui kurikulum kebangsaan yang bermula dari sekolah rendah, murid diajar mengenai institusi beraja, pilihan raya, identiti negara, kemerdekaan negara dan pembentukan Malaysia untuk membentuk karakter mereka sebagai warganegara yang bertanggungjawab yang cinta akan negara. Pada peringkat sekolah menengah pula, pengetahuan murid diperkukuhkan lagi tentang perlembagaan, pilihan raya dan prosesnya serta konsep kedaulatan negara agar murid mengetahui hak dan tanggungjawab serta mempunyai kesedaran sebagai pengundi.

Secara keseluruhan, usaha KPM memperkenalkan kandungan berkaitan dengan kesedaran rakyat sebagai pengundi dalam mata pelajaran Sejarah dan pelaksanaan Pendidikan Sivik dalam lima mata pelajaran, akan memberi pengetahuan, kemahiran dan nilai dalam sejarah di mana pembelajaran lebih mendalam serta dekat dengan kehidupan murid diaplikasikan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN LIM GUAN ENG [BAGAN]

TARIKH : 10 DISEMBER 2020 (KHAMIS)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan jumlah dan nilai projek rundingan terus yang diluluskan untuk setiap tahun 2013-2017 dan juga diluluskan oleh beliau sendiri sebagai Menteri Kewangan.

JAWAPAN

Tuan Yang Di Pertua,

1. Untuk makluman Yang Berhormat, perolehan Kerajaan dilaksanakan berdasarkan prinsip perolehan Kerajaan iaitu persaingan terbuka, akauntabiliti awam, ketelusan, nilai faedah terbaik serta adil dan saksama seperti yang digariskan oleh peraturan dan tatacara di dalam Arahan Perbendaharaan dan Pekeliling Perbendaharaan. Walau bagaimanapun, Kerajaan membenarkan pelaksanaan perolehan secara rundingan terus berdasarkan Garis Panduan Permohonan Perolehan Secara Rundingan Terus yang menetapkan permohonan hanya boleh dikemukakan berasaskan lima (5) kriteria khusus seperti berikut:-

- i. Kesegeraan atas kepentingan awam di mana sekiranya tidak dilaksanakan segera akan memberi impak negatif kepada penyampaian perkhidmatan awam;

- ii. Bagi maksud penyeragaman untuk memastikan kesesuaian penggunaan (*compatibility*) antara barangan sedia ada dengan barangan baru yang akan dibeli;
 - iii. satu punca bekalan/perkhidmatan yang mana hanya satu syarikat sahaja boleh membekalkan barangan/perkhidmatan yang dikehendaki;
 - iv. melibatkan keselamatan/strategik bagi pembelian alat keselamatan atau projek strategik yang perlu dirahsiakan demi kepentingan negara; atau
 - v. kontrak dengan syarikat pembuat Bumiputera yang memenuhi semua syarat kelayakan demi memupuk pertumbuhan syarikat Bumiputera yang bertaraf pembuat.
2. Sejak diperkenalkan mulai tahun 2015, penambahbaikan berterusan telah dilaksanakan terhadap garis panduan ini bagi memastikan ia kekal relevan. Antara penambahbaikan terkini yang telah dilaksanakan mulai tahun 2019 adalah dengan mewajibkan Kementerian/Agensi untuk melaksanakan penilaian terhadap syarikat yang dicadangkan. Ini bagi memastikan hanya syarikat yang benar-benar berkeupayaan dari segi kewangan dan teknikal dipertimbangkan untuk perolehan secara rundingan terus.
3. Sebagai langkah kawalan, Kementerian/Agensi perlu mengemukakan permohonan perolehan secara rundingan terus berdasarkan kriteria di atas kepada Kementerian Kewangan untuk pertimbangan dan kelulusan sebelum perolehan boleh dilaksanakan.
4. Selain itu, peraturan perolehan Kerajaan juga diperkemaskan melalui surat arahan Kementerian Kewangan bertarikh 29 Jun 2018 yang memansuhkan kaedah perolehan secara tender terhad yang mana dasar ini masih berkuat kuasa sehingga sekarang

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN ABDUL LATIFF BIN ABDUL RAHMAN
[KUALA KRAI]**

TARIKH : 10 DISEMBER 2020 (KHAMIS)

SOALAN

Minta **MENTERI PENDIDIKAN** menyatakan adakah pihak Kementerian bersedia mengangkat para guru sebagai 'barisan hadapan' dan mendapat imbuhan sebagaimana 'barisan hadapan' lain berikutan penambahan beban tugas mereka dalam menghadapi wabak COVID-19 ini.

JAWAPAN

Tuan Yang di-Pertua,

KPM menyambut baik saranan Ahli Yang Berhormat agar guru diiktiraf sebagai salah satu perkhidmatan yang dikategorikan sebagai barisan hadapan. Namun demikian, mengambil kira jumlah guru di seluruh negara, KPM sedar implikasi kewangan kepada Kerajaan sekiranya Elaun Khas barisan hadapan diberikan kepada semua guru.

Sebagai usaha untuk mengurangkan beban tugas guru sewaktu pengajaran dalam tempoh pandemik ini, KPM akan terus memberikan keutamaan terhadap kebajikan guru serta berusaha dan mengambil inisiatif untuk membantu guru-guru dalam pelbagai aspek termasuklah menaik taraf kemudahan capaian internet dan infrastruktur komunikasi bagi memastikan agenda pendidikan dapat dilaksanakan dengan lebih baik dan pada masa yang sama menjaga kebajikan guru.

KPM mengucapkan setinggi-tinggi penghargaan dan terima kasih kepada semua guru di atas segala usaha yang bersungguh-sungguh dalam melaksanakan tanggungjawab untuk memastikan murid dapat terus mengikuti pembelajaran dalam tempoh yang mencabar ini.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK WILSON UGAK ANAK KUMBONG
(HULU RAJANG)**

TARIKH : 10 DISEMBER 2020 (KHAMIS)

SOALAN

Minta **MENTERI PERTAHANAN** menyatakan :-

- (a) status Jalan Jiwa Murni Pekan-Belaga ke Nanga Merit sepanjang 130km ; dan
- (b) status Jalan Jiwa Murni Nanga Merit ke Jambatan Baleh, Bahagian Kapit sepanjang 60 km.

JAWAPAN

Tuan Yang di-Pertua,

Projek Jiwa Murni bagi kedua-dua projek ini sedang dilaksanakan dan pelaksanaannya adalah mengikut jadual. Projek Jiwa Murni bagi pembinaan jalan dari Belaga ke Nanga Merit telah mula dilaksanakan pada 4 Mei 2016 dan dijangka siap sepenuhnya pada penghujung tahun 2021. Kos keseluruhan bagi projek ini adalah berjumlah RM316 juta dan kemajuan terkini adalah di tahap 80%. Bagi projek pembinaan jalan dari Nanga Merit ke Sg Baleh pula, ia telah mula dilaksanakan 19 September 2016 dan dijangka siap sepenuhnya pada bulan Mac 2021. Kos keseluruhan bagi projek ini adalah berjumlah RM148 juta dan kemajuan terkini adalah di tahap 91%. Pelaksanaan Projek Jiwa Murni bagi kedua-dua projek ini akan menghubungkan 101 buah kampung dengan jumlah penduduk seramai 19,000 orang.

Penularan pandemik COVID-19 sedikit sebanyak telah menjejaskan kelancaran pelaksanaan projek-projek yang dirancang. Namun, pihak ATM dengan kerjasama dari agensi kerajaan yang lain akan terus komited untuk menyiapkan projek ini dalam tempoh yang telah ditetapkan demi kepentingan penduduk setempat.

Terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : PUAN WONG SHU QI [KLUANG]

TARIKH : 10 DISEMBER 2020 (KHAMIS)

SOALAN

PUAN WONG SHU QI [KLUANG] minta **MENTERI KOMUNIKASI DAN MULTIMEDIA** menyatakan jumlah aduan gangguan atas talian (online harassment) yang diterima dan bilangan aduan yang dibuka siasatan oleh Suruhanjaya Komunikasi dan Multimedia Malaysia (SKMM), mengikut pecahan jantina, umur, bangsa serta negeri pengadu dan pelaku antara tahun 2015 dan 2020.

JAWAPAN

Tuan Yang di-Pertua,

Untuk makluman Ahli Yang Berhormat, daripada tahun 2016 sehingga September 2020, pihak Suruhanjaya Komunikasi dan Multimedia Malaysia (SKMM) telah menerima sebanyak **10,406** aduan awam secara umum yang berkait dengan gangguan atau "*harassment*" (dengan izin) yang dilakukan secara dalam talian, yang merangkumi tetapi tidak terhad kepada buli, gangguan seksual, ancaman, tindakan menakut-nakutkan serta penyalahgunaan maklumat, butiran atau gambar peribadi bagi tujuan penganiayaan dan untuk memalukan atau mengaibkan individu tertentu.

Walaupun bagaimanapun, pihak SKMM tidak mempunyai maklumat mengikut pecahan jantina, umur, bangsa serta negeri pengadu dan

pelaku. Kesemua aduan yang diterima disusuli tindakan oleh pihak SKMM, termasuklah pemberian nasihat atau panduan kepada pihak yang terkesan, merujuk kepada penyedia platform media sosial yang terlibat. SKMM juga akan menjalankan siasatan dan penelitian lanjut terhadap kandungan berasaskan terma perkhidmatan dan piawaian komuniti mereka sekiranya didapati melanggar peruntukan Seksyen 233 Akta Komunikasi dan Multimedia 1998, iaitu melarang penyebaran kandungan sumbang, lucah, palsu, mengancam atau jelik sifatnya, **dengan niat** untuk menyakitkan hati, menganiayai, mengugut atau mengganggu orang lain.

Manakala, aduan yang berada di luar bidang kuasa SKMM akan dirujuk kepada agensi penguatkuasaan yang berkenaan, dan bantuan teknikal akan diberikan kepada pihak mereka. Dalam tempoh tersebut, sejumlah **796** kes telah disiasat oleh pihak SKMM berhubung penyalahgunaan media sosial melibatkan kesalahan di bawah peruntukan Seksyen 233 AKM 1998, dan **56** daripadanya telah dihadapkan ke mahkamah dengan **17** pertuduhan.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 10 DISEMBER 2020 (KHAMIS)

SOALAN

DATO' JOHARI BIN ABDUL [SUNGAI PETANI] minta **MENTERI KOMUNIKASI DAN MULTIMEDIA** menyatakan sejak ditukar dari analog kepada digital berapa peratus dari pengguna TV di seluruh negara yang mendapat faedah dari pertukaran ini. Jika ada yang belum, apa punca kelewatan ini.

JAWAPAN

Tuan Yang di-Pertua,

Untuk makluman Ahli Yang Berhormat, pada peringkat awal, *Analog Switch Off (ASO)* telah dirancang agar dicapai pada tahun 2015. Namun, tarikh ASO dilanjutkan kepada tahun 2019 bagi memastikan ketersediaan rangkaian, sambungan dekoder dan juga penonton. Sehingga kini, semua kawasan berpenduduk boleh menikmati siaran TV Digital *myFreeview* yang mana 95% kawasan diliputi melalui kaedah pemancaran terrestrial manakala lebih 5% kawasan diliputi melalui kaedah satelit berbanding dengan liputan siaran TV analog yang meliputi antara 60%-98% kawasan berpenduduk sahaja. Memandangkan siaran digital ini adalah percuma, maka tiada rekod bilangan pengguna berdaftar seperti siaran berbayar yang lain contohnya Astro dan HyppTV. Walau bagaimanapun, kini terdapat

sejumlah 5,282,430 penonton siaran TV Digital *myFreeview* berdasarkan kepada laporan syarikat kaji selidik pada April 2020 yang telah dibentangkan kepada Kementerian.

Menjelang penutupan penyiaran TV analog pada Oktober 2019, sejumlah 1,579,942 dekoder percuma telah diagihkan kepada penerima B40 oleh Syarikat MYTV Broadcasting Sdn Bhd (MYTV). Sekali lagi, MYTV telah mengagihkan sejumlah 339,780 unit dekoder dari November 2019 sehingga Februari 2020. Manakala Suruhanjaya Komunikasi dan Multimedia (SKMM) telah menyediakan tambahan 300,000 unit dekoder kepada golongan B40 dan Orang Kelainan Upaya (OKU) di seluruh negara. Pemberian sebanyak 92% jumlah dekoder telah diagihkan daripada SKMM sejak Mei lalu dan telah selesai pada 6 November 2020. Jelas di sini bahawa selain daripada Kerajaan telah berjaya menyelesaikan ASO pada tahun 2019, Kerajaan turut prihatin dengan memberikan dekoder secara percuma kepada lebih 2.2 juta golongan B40 dan OKU di seluruh negara bagi menikmati perkhidmatan siaran ini.

Dengan adanya siaran TV Digital melalui *myFreeview*, rakyat telah disediakan dengan 16 saluran TV dan 14 saluran radio secara percuma dan ia dapat dinikmati dengan kualiti *Standard Definition* (SD) dan *High Definition* (HD) di seluruh negara. Di samping itu juga, SKMM telah mengeluarkan 13 lesen baru kepada syarikat penyiar bagi menggalakkan penambahan saluran baru di *myFreeview*.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN TONY PUA KIAM WEE [DAMANSARA]

TARIKH : 10 DISEMBER 2020 (KHAMIS)

SOALAN

TUAN TONY PUA KIAM WEE [DAMANSARA] minta **MENTERI KEWANGAN** menyatakan sama ada 'sovereign ratings' Malaysia yang dinilai dan diterbitkan oleh S&P, Moody's dan Fitch akan terjejas akibat kemerosotan kedudukan kewangan Kerajaan. Apakah langkah Kerajaan untuk mengukuhkan 'rating' tersebut atau ianya tidak lagi dilihat penting dalam situasi ekonomi semasa.

JAWAPAN

Tuan Yang di-Pertua,

1. Krisis akibat pandemik COVID-19 ini telah menyebabkan kerajaan di seluruh dunia melaksanakan langkah rangsangan bagi menyelamatkan ekonomi yang terjejas teruk dan langkah ini secara umumnya meningkatkan paras defisit fiskal dan hutang. Berdasarkan laporan yang diterbitkan pada Oktober lalu, IMF mengunjurkan bahawa langkah rangsangan yang telah dilaksanakan oleh pelbagai negara berjumlah USD11.7 trilion dan hutang sektor awam global dijangka mencecah paras 100% daripada KDNK global pada akhir 2020. Berikutan prospek pertumbuhan ekonomi yang lembap dan kedudukan fiskal yang lebih lemah, banyak negara telah dikenakan langkah penarafan bersifat negatif. Bermula dari awal tahun ini, ketiga-tiga agensi penarafan antarabangsa utama iaitu Fitch Ratings, Moody's Investors Service dan S&P Global secara kolektifnya telah mengambil sekitar 100 tindakan penurunan penarafan dan lebih 120 semakan semula *outlook* kepada negatif.

2. Malaysia, turut tidak terkecuali daripada tindakan ini. Pada 4 Disember 2020, agensi penarafan Fitch telah menurunkan penarafan Malaysia daripada A- kepada BBB+ dengan *outlook* stabil. Semakan semula ini berdasarkan kepada kesan COVID-19 dan ketidaktentuan ekonomi dunia ke atas ekonomi negara dan tidak berkaitan dengan asas ekonomi negara yang masih kukuh. Walau bagaimanapun, setakat ini agensi penarafan Moody's masih mengekalkan penarafan negara pada A3 dengan *outlook* stabil manakala agensi S&P memberikan penarafan A- dengan *outlook* negatif.

3. Fokus Kerajaan pada masa ini adalah untuk menyokong pelan pemulihan ekonomi dan merangsang aktiviti perniagaan serta melindungi kesejahteraan rakyat. Langkah ini perlu dilaksanakan demi memastikan kapasiti ekonomi terpelihara serta mengelakkan ekonomi daripada terus merosot, sehingga mengakibatkan kehilangan pekerjaan. Sehubungan dengan itu, seperti yang dibentangkan dalam Belanjawan 2021, Kerajaan

akan meneruskan dasar fiskal mengembang bagi menyokong ekonomi dan memelihara kebajikan rakyat.

Tuan Yang di-Pertua,

4. Sesi libat urus yang lebih intensif bersama agensi penarafan kredit diteruskan dengan berkongsi maklumat terperinci mengenai prospek pertumbuhan ekonomi yang kekal berdaya tahan berbanding negara berpenarafan setara serta tindak balas dasar Kerajaan dalam menangani krisis pandemik ini. Pertumbuhan ekonomi negara juga dijangka kembali pulih dalam tempoh lebih singkat berbanding negara dalam kategori penarafan 'A' yang lain.

5. Ini adalah untuk memberi keyakinan kepada agensi berkenaan bahawa setelah ekonomi kembali pulih, Kerajaan akan kembali melaksanakan langkah konsolidasi fiskal dan inisiatif pengukuhan kedudukan fiskal kerajaan termasuk meluaskan asas hasil, mengukuhkan pentadbiran dan pematuhan cukai serta peningkatan kecekapan perbelanjaan bagi mengawal paras defisit fiskal Kerajaan. Oleh yang demikian, keperluan pinjaman Kerajaan akan dapat dikurangkan dan seterusnya ini akan dapat mengawal hutang negara. Walaupun krisis ini memberi kesan kepada kewangan Kerajaan, namun Kerajaan yakin dengan asas ekonomi Malaysia yang kukuh, Kerajaan akan dapat memperbaiki semula kedudukan penarafan setelah ekonomi negara pulih dan stabil dalam jangka sederhana.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN AKMAL NASRULLAH BIN
MOHD. NASIR [JOHOR BAHRU]**

TARIKH : 10 DISEMBER 2020 (KHAMIS)

SOALAN

TUAN AKMAL NASRULLAH BIN MOHD. NASIR [JOHOR BAHRU] minta **MENTERI KOMUNIKASI DAN MULTIMEDIA** menyatakan pendirian Kementerian terhadap pandangan dan kritikan masyarakat terhadap pentadbiran kerajaan seperti *#MuhyiddinOut* atau *#MalaysiaForward* yang menjadi trend di Twitter.

JAWAPAN

Tuan Yang di-Pertua,

Untuk makluman Ahli Yang Berhormat, perkongsian, perbincangan, komentar, kritikan, maklum balas dan pendapat pihak tertentu berhubung situasi, kejadian, perkara atau isu semasa adalah sebahagian daripada hak dan kebebasan yang termaktub dalam Perkara 10 Perlembagaan Persekutuan Malaysia. Pihak Kerajaan komited dalam mendukung hak tersebut bagi memastikan setiap rakyat Malaysia menikmati kebebasan asasi mereka.

Kebebasan untuk membincangkan perkara-perkara atau berita secara terbuka dan telus di media sosial perlu dikekalkan tetapi ia harus dibuat dengan cara yang berhemah dan tidak melanggar sebarang peruntukan undang-undang.

Tindakan boleh diambil oleh Suruhanjaya Komunikasi dan Multimedia Malaysia (SKMM) di bawah Seksyen 233 Akta Komunikasi dan Multimedia 1998 (AKM98) terhadap individu yang menyalahgunakan internet atau perkhidmatan aplikasi termasuk media sosial, media elektronik sebagai platform bagi menyebarkan kandungan yang bersifat lucah, sumbang, palsu, mengancam atau jelik sifatnya. Jika disabitkan kesalahan boleh didenda tidak melebihi RM50,000 atau dipenjarakan selama tempoh tidak melebihi satu (1) tahun atau kedua-duanya sekali.

Undang-undang relevan yang lain juga akan terpakai mengikut fakta kes yang disiasat, dan juga tertakluk kepada kesalahan-kesalahan lain di bawah bidang kuasa agensi penguatkuasaan yang berkenaan, seperti PDRM. Walau bagaimanapun, keputusan untuk menjalankan tindakan penguatkuasaan lanjut adalah berdasarkan kepada pertimbangan Jabatan Peguam Negara (AGC).

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN AHMAD FAHMI FADZIL
[LEMBAH PANTAI]**

TARIKH : 10 DISEMBER 2020 (KHAMIS)

SOALAN

TUAN AHMAD FAHMI FADZIL [LEMBAH PANTAI] minta **MENTERI KOMUNIKASI DAN MULTIMEDIA** menyatakan adakah sebuah Majlis Media Malaysia akan ditubuhkan, dan jika tidak, apakah sebab-sebab yang menghalang majlis ini dari ditubuhkan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Komunikasi dan Multimedia Malaysia telah pun menerima laporan *pro-tem committee* Majlis Media Malaysia (MMM) berkaitan Penubuhan Majlis Media Malaysia termasuk cadangan draf Rang Undang-Undang (RUU) pada 3 Ogos 2020 yang lalu. Kementerian ini juga mendapati bahawa *pro-tem committee* telah melaksanakan inisiatif sendiri dengan memuat naik dokumen-dokumen tersebut dalam laman sesawang majlismedia.my / mediacouncil.my untuk mendapatkan maklum balas daripada orang awam berhubung draf RUU MMM tersebut.

Kementerian ini telah membuat penelitian awal terhadap Draf RUU MMM yang telah diterima serta mengedarkannya kepada bahagian serta jabatan yang berkaitan di bawah Kementerian ini untuk mendapatkan maklum balas awal yang sewajarnya. Walau bagaimanapun, terdapat juga beberapa perkara di dalam draf RUU tersebut yang memerlukan penjelasan tambahan daripada *pro-tem committee*. Justeru, kesemua persoalan tersebut telah diajukan kepada *pro-tem committee* pada 21 Oktober 2020 bagi mendapatkan penjelasan tambahan seterusnya membolehkan penelitian lebih lanjut dibuat terhadap draf RUU tersebut dan tindakan susulan sewajarnya.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : TUAN WILLIAM LEONG JEE KEEN
[SELAYANG]**

TARIKH : 10 DISEMBER 2020 (KHAMIS)

SOALAN

TUAN WILLIAM LEONG JEE KEEN [SELAYANG] minta **MENTERI KEWANGAN** menyatakan alasan-alasan kerana tidak membantu dalam penyusunan semula Malaysia Airlines dan langkah-langkah untuk membantu kakitangan yang akan kehilangan pekerjaan mereka, pembekal dan industri-industri sokongan.

JAWAPAN

1. Tuan Yang Dipertua, selari dengan pelaksanaan Pelan Pemulihan Malaysian Airline System Bhd (MAS) yang bertujuan menstruktur semula dan memulihkan operasi syarikat penerbangan nasional, Malaysia Airlines Berhad (MAB) telah ditubuhkan pada 7 November 2014. Penubuhan MAB bertujuan untuk mengambil alih operasi, aset dan liabiliti syarikat MAS. MAB seterusnya diletakkan di bawah Malaysia Aviation Group Berhad (MAGB) yang dimiliki sepenuhnya oleh Khazanah Nasional Berhad (Khazanah).

2. Memandangkan Kerajaan tidak mempunyai sebarang pegangan saham dalam MAGB dan MAB, sebarang cadangan pemulihan dan penstrukturan syarikat adalah tertakluk kepada pertimbangan dan kelulusan Lembaga Pengarah Khazanah, selaku pemegang saham tunggal syarikat.

3. Sehingga kini, Khazanah telah menyuntik kira-kira RM28 bilion ke dalam syarikat penerbangan tersebut manakala jumlah liabiliti MAGB pada masa ini yang akan disusun semula adalah dianggarkan sebanyak RM16 bilion.

4. Prestasi kewangan MAGB antara tahun 2015 hingga 2018 adalah seperti berikut:-

Tahun	Keuntungan/ (Kerugian) - RM
2015	(1.1b)
2016	(0.7b)
2017	(1.2b)
2018	(1.3 b)

5. Setakat 31 Ogos 2020, jumlah kecairan yang dimiliki oleh Kumpulan MAGB adalah kira-kira RM366 juta selain kira-kira RM578 juta yang tersedia untuk digunakan daripada dana yang diperuntukkan oleh Khazanah.

6. Kesan COVID-19 terhadap industri penerbangan secara global adalah amat buruk dan Malaysia Airlines tidak terkecuali daripada menerima impak daripada penularan pandemik ini. Malaysia Airlines kini beroperasi dengan kira-kira 75% daripada pesawatnya tidak dapat diterbangkan akibat sekatan perjalanan, dan turut menyaksikan kapasiti dan pendapatannya terjejas.

7. Bagi mengatasi masalah kewangan MAGB dan MAB, Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut.

8. Dalam masa yang sama, pihak pengurusan Khazanah juga akan melaksanakan usaha terbaik bagi memastikan kebajikan kakitangan kumpulan MAGB terpelihara termasuk, sekiranya perlu, bayaran pampasan yang setimpal yang mematuhi undang-undang pekerjaan.

9. Untuk makluman, Kerajaan komited untuk membantu semua pihak yang terjejas dengan penularan wabak COVID-19. Oleh itu, Kerajaan melalui Skim Jaminan Prihatin Danajamin (SJPD) dan Skim Jaminan Pembiayaan Perniagaan (SJPP) menyediakan program pembiayaan dengan jaminan sehingga 80% ke atas pembiayaan bagi modal kerja syarikat. Namun demikian, kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor penerbangan, pembekal dan industri-industri sokongan tertakluk kepada syarat-syarat kelayakan yang telah ditetapkan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN LIM GUAN ENG [BAGAN]

TARIKH : 10 DISEMBER 2020 [KHAMIS]

SOALAN

Minta **MENTERI PERUMAHAN DAN KERAJAAN TEMPATAN** menyatakan adakah benar bahawa Ketua Setiausaha beliau telah membuat permohonan tentang Projek Sisa Pepejal Taman Beringin sebanyak RM170.3 juta tanpa persetujuan beliau dan apakah arahan bertulis yang dikeluarkan oleh mantan Menteri Kewangan.

JAWAPAN

Tuan Yang di-Pertua,

1. Untuk makluman Yang Berhormat, projek ini merupakan projek rundingan terus yang telah diluluskan melalui Mesyuarat Jemaah Menteri (MJM) pada 3 November 2017. Mesyuarat tersebut telah bersetuju melantik syarikat Bumi Segar Indah Sdn. Bhd. (BSI) untuk Projek Mereka Bentuk, Membina dan Mengoperasikan Stesen Pemindahan Sisa Pepejal Baharu di Taman Beringin, Kepong dengan kadar yuran *tipping* sebanyak RM49.00/tan selama 6 tahun dan opsyen untuk memperbaharui operasi adalah selama 6 tahun berikutnya.

2. Selepas perubahan Kerajaan susulan Pilihan Raya Umum Ke - 14 (PRU14), Kementerian Kewangan (MOF) telah mengemukakan surat bertarikh 21 Ogos 2018 agar Kementerian Perumahan dan Kerajaan Tempatan (KPKT) meneliti keperluan pembinaan projek ini dan meminta KPKT mengemukakan permohonan baharu kepada MOF untuk penilaian semula keperluan pelaksanaannya. Setelah beberapa siri rundingan dilaksanakan, KPKT telah mengemukakan cadangan baharu pelaksanaan projek ini dengan pengurangan kadar yuran *tipping* kepada RM43.20/tan dan perkara ini telah dipersetujui oleh MOF pada 20 Februari 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 10 DISEMBER 2020 (KHAMIS)

SOALAN

Minta **MENTERI PENDIDIKAN** menyatakan jumlah peruntukan penyelenggaraan yang telah diturunkan kepada sekolah-sekolah Tamil (SJKT) di seluruh negara setakat ini. Memandangkan terdapat keperluan yang munasabah, berapa jumlah prasekolah yang telah siap dibina di SJKT pada tahun ini. Berikan senarai nama sekolah-sekolah tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk menyediakan kemudahan dan fasiliti pendidikan kepada semua sekolah tanpa mengira aliran bagi menyediakan suasana pembelajaran yang selamat dan selesa kepada semua murid.

Untuk makluman Ahli Yang Berhormat, pada tahun 2020, KPM telah diluluskan peruntukan penyelenggaraan sebanyak RM800 juta, termasuk RM50 juta untuk penyelenggaraan Sekolah Jenis Kebangsaan Tamil (SJKT). Namun demikian, sejumlah RM223.3 juta daripada keseluruhan peruntukan tersebut telah dikenakan waran sekatan oleh Kementerian Kewangan.

NO. SOALAN : 45

Oleh itu, agihan terkini peruntukan penyelenggaraan SJKT adalah sebanyak RM46.41 juta untuk 339 buah SJKT seperti berikut:

- a) 118 SJKT berstatus Sekolah Kerajaan sebanyak RM7.66 juta; dan
- b) 221 SJKT berstatus Sekolah Bantuan Kerajaan sebanyak RM38.75 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATUK SERI DR. MUJAHID YUSOF RAWA
[PARIT BUNTAR]**

TARIKH : 10 DISEMBER 2020 (KHAMIS)

SOALAN

DATUK SERI DR. MUJAHID YUSOF RAWA [PARIT BUNTAR] minta **MENTERI KEWANGAN** menyatakan sekiranya Kerajaan berhasrat mempertimbangkan pengecualian cukai untuk program berhenti merokok seperti yang diamalkan di Amerika Syarikat.

JAWAPAN

Tuan Yang di-Pertua,

1. Untuk makluman Ahli Yang Berhormat, pada masa ini Kerajaan tiada hasrat untuk memberi pengecualian cukai bagi program berhenti merokok. Cukai yang dikutip oleh Kerajaan hasil daripada produk rokok dan tembakau dimasukkan ke dalam Kumpulan Wang Disatukan dan diagihkan semula melalui peruntukan tahunan kepada kementerian dan agensi termasuk Kementerian Kesihatan Malaysia (KKM) bagi tujuan penyediaan perkhidmatan kesihatan serta rawatan perubatan.

2. Ini termasuklah perkhidmatan rawatan berhenti merokok yang disediakan oleh KKM sejak tahun 2000. Perkhidmatan rawatan berhenti merokok ini telah dimulakan di klinik kesihatan dan diperluaskan di hospital-hospital di bawah KKM. Mulai tahun 2015, perkhidmatan rawatan ini telah diperkukuhkan dengan jalinan kerjasama pintar bersama perkhidmatan sektor swasta yang dinamakan sebagai perkhidmatan mQuit.

3. Perkhidmatan rawatan berhenti merokok mQuit telah dilaksanakan secara berfasa di mana fasa pertama bermula pada tahun 2015 sehingga 2017 dengan matlamat meningkatkan kebolehcapaian rakyat untuk mendapatkan perkhidmatan berhenti merokok termasuklah daripada sektor swasta. Fasa kedua telah bermula pada tahun 2017 sehingga 2020 dengan memberi tumpuan khusus bagi menggalakkan perokok di sektor pekerjaan untuk mendapatkan rawatan berhenti merokok di fasiliti yang telah disediakan. Perkhidmatan berhenti merokok mQuit akan memasuki fasa ketiga mulai tahun 2021 sehingga 2025 dengan matlamat untuk terus menggalakkan penyertaan perokok mendapatkan perkhidmatan berhenti merokok.

4. Melalui peruntukan yang disalurkan kepada KKM, Kerajaan menanggung kos rawatan farmakologi khusus bagi rawatan berhenti merokok yang terdiri daripada Terapi Pengganti Nikotin serta Terapi Pengganti Bukan Nikotin. KKM telah membelanjakan sejumlah RM2 juta pada tahun 2018 bagi memberikan rawatan farmakologi kepada seramai 12,640 orang perokok, manakala sejumlah RM2.8 juta telah dibelanjakan pada tahun 2019 bagi merawat seramai 9,222 orang perokok.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 10 DISEMBER 2020 (KHAMIS)

SOALAN

Minta **MENTERI PENDIDIKAN** menyatakan secara berstatistik dengan memberikan senarai penuh sekolah-sekolah SJKC dan SJKT yang telah menerima peruntukan penyelenggaraan (daripada RM50 juta masing-masing untuk SJKC dan SJKT) daripada Kerajaan pada tahun ini dengan jumlah yang telah diterima oleh setiap sekolah tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk menyediakan kemudahan dan fasiliti yang lengkap kepada semua sekolah tanpa mengira aliran bagi menyediakan suasana pembelajaran yang selamat dan selesa kepada semua murid.

Untuk makluman Ahli Yang Berhormat, pada tahun 2020, KPM telah diluluskan peruntukan penyelenggaraan sebanyak RM800 juta, termasuk RM50 juta untuk penyelenggaraan Sekolah Jenis Kebangsaan Cina (SJKC) dan RM50 juta untuk penyelenggaraan Sekolah Jenis Kebangsaan Tamil (SJKT). Namun demikian, sejumlah RM223.3 juta daripada keseluruhan peruntukan tersebut telah dikenakan waran sekatan oleh Kementerian Kewangan.

Oleh itu, agihan terkini peruntukan penyelenggaraan untuk SJKC adalah sebanyak RM46.57 juta dan SJKT sebanyak RM46.41 juta. Perincian adalah seperti berikut:

- a) 311 SJKC berstatus Sekolah Kerajaan sebanyak RM26.91 juta;
- b) 291 SJKC berstatus Sekolah Bantuan Kerajaan sebanyak RM19.66 juta;
- c) 118 SJKT berstatus Sekolah Kerajaan sebanyak RM7.66 juta; dan
- d) 221 SJKT berstatus Sekolah Bantuan Kerajaan sebanyak RM38.75 juta.

Saya juga ingin merujuk jawapan KPM bagi pertanyaan Jawab Lisan pada 16 November 2020 mengenai perkara yang sama. Adalah dimaklumkan bahawa penyaluran peruntukan penyelenggaraan berjumlah RM89.67 juta kepada SJKC dan SJKT adalah sebelum mengambil kira waran sekatan oleh Kementerian Kewangan.

Untuk makluman Ahli Yang Berhormat, KPM juga telah menerima peruntukan Pakej Ransangan Ekonomi (PRE) 2020 sebanyak RM100 juta. Peruntukan ini adalah bagi penyelenggaraan kecil sekolah seluruh negara dan penyediaan peralatan serta bahan seperti alat pengimbas suhu badan, pensanitasi tangan dan sabun pencuci tangan yang mencukupi untuk warga sekolah susulan penularan pandemik COVID-19.

Sekian, terima kasih.

**PEMBERITAHUAN PERTANYAAN DEWAN RAKYAT MALAYSIA
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN ANYI NGAU [BARAM]

TARIKH : 10 DISEMBER 2020 (KHAMIS)

SOALAN

minta **MENTERI PEMBANGUNAN LUAR BANDAR** menyatakan jumlah peruntukan serta bilangan projek bekalan air luar bandar yang diluluskan serta dilaksanakan di kawasan Baram sejak tahun 2018. Nyatakan nama/tempat projek yang telah siap dan sedang dilaksanakan.

JAWAPAN

Tuan Yang di-Pertua,

Untuk makluman Yang Berhormat terdapat empat(4) projek Bekalan Air Luar Bandar (BALB) di kawasan Baram yang telah siap dan sedang dalam pelaksanaan. Projek yang telah siap adalah projek BALB Kawasan Beluru, Bahagian Miri dengan kos projek sebanyak RM69 juta. Projek ini siap pembinaan pada tahun 2019 dan dapat memberi manfaat kepada 962 buah bilangan rumah.

Manakala tiga (3) projek lagi iaitu Projek BALB Kawasan Marudi Bahagian Miri, Sarawak dengan kos sebanyak RM40 juta. Projek ini di dalam peringkat pembinaan dengan status pelaksanaan 80% dan dijangka siap pada Disember 2020. Bagi Projek BALB Kawasan Long Laput Bahagian Miri, dengan kos RM12 juta dan Projek Bekalan Air Luar Bandar (BALB) Kawasan Long Lama Bahagian Miri, dengan kos sebanyak RM58 juta masih di dalam peringkat reka bentuk.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : DATUK HAJI HASANUDDIN BIN MOHD YUNUS [HULU LANGAT]

TARIKH : 10 DISEMBER 2020 (KHAMIS)

SOALAN

minta **MENTERI TENAGA DAN SUMBER ASLI** menyatakan apakah Kementerian akan menyediakan insentif kewangan selain latihan kepada Malim Gunung Perhutanan, khasnya untuk belia-belia tempatan bagi merancakkan lagi "*adventure tourism*" serta menambahbaik Akta Perhutanan Negara 1984.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian Tenaga dan Sumber Asli melalui Jabatan Perhutanan Semenanjung Malaysia (JPSM) telah memperkenalkan Kursus Malim Gunung Perhutanan (MGP) dengan kerjasama Jabatan Bomba dan Penyelamat Malaysia (JBPM). Perkhidmatan Malim Gunung Perhutanan diperkenalkan bagi mengatasi insiden kemalangan yang dilaporkan di Taman Eko Rimba dan Hutan Taman Negeri seperti kecederaan semasa menjalankan aktiviti pendakian, laporan orang hilang, sesat atau tersasar daripada laluan denai pendakian. Kursus Malim Gunung Perhutanan di negeri-negeri Semenanjung Malaysia juga merupakan usaha Kementerian bagi

merencanakan lagi aktiviti pelancongan kembaraan (*adventure tourism*) di dalam Hutan Simpanan Kekal (HSK).

2. KeTSA melalui JPSPM juga telah memohon peruntukan sebanyak RM9 juta bagi Program Pemerkasaan Ekopelancongan Sumber Asli di bawah Rancangan Malaysia Ke-12 (RMKe-12) termasuk pelaksanaan Kursus Malim Gunung Perhutanan. Kursus ini akan bermula pada tahun 2021 dan keutamaan akan diberikan kepada penduduk tempatan terutamanya golongan belia yang menjadikan Malim Gunung Perhutanan sebagai kerjaya. Hanya Malim Gunung Perhutanan yang hadir latihan dan didaftarkan dengan JPSPM sahaja dibenarkan untuk mengendalikan pelawat bagi aktiviti pendakian mulai 2021. Pada masa ini, Kerajaan tidak menyediakan insentif kewangan kepada Malim Gunung Perhutanan, namun demikian mana-mana pihak yang berminat mengikuti kursus Malim Gunung Perhutanan yang dianjurkan oleh JPSPM tidak dikenakan sebarang bayaran.

3. Adalah diharapkan dengan adanya latihan yang diberikan kepada penduduk tempatan terutamanya belia, kerjaya Malim Gunung Perhutanan akan membantu meningkatkan taraf sosioekonomi selain merencanakan dan menambah baik kualiti perkhidmatan ekopelancongan berasaskan kekayaan semulajadi.

4. Selain itu, Kementerian juga dalam proses menambah baik Akta Perhutanan Negara 1984 [*Akta 313*] dengan memasukkan Hutan Taman Negeri sebagai pengelasan baharu HSK. Ini membolehkan Pihak Berkuasa Negeri mempelbagaikan fungsi hutan sebagai destinasi ekopelancongan domestik selain menjana sumber ekonomi baharu kepada Kerajaan Negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATUK SERI DR. HAJI DZULKEFLY
BIN AHMAD [KUALA SELANGOR]**

TARIKH : 10 DISEMBER 2020 (KHAMIS)

SOALAN

DATUK SERI DR. HAJI DZULKEFLN AHMAD [KUALA SELANGOR]
minta **MENTERI KEWANGAN** menyatakan apakah pendirian Kerajaan
Perikatan Nasional terhadap usaha menyelamatkan Malaysia Airlines
Berhad (MAB) yang terjejas ekoran COVID-19.

JAWAPAN

Tuan Yang di-Pertua,

1. Untuk makluman Ahli Yang Berhormat, Kerajaan komited untuk membantu semua pihak yang terjejas dengan penularan wabak COVID-19 termasuk sektor penerbangan dan pengangkutan udara. Sehubungan dengan itu, Kerajaan melalui Skim Jaminan Prihatin Danajamin (SJPD) menyediakan program pembiayaan bernilai RM50 bilion dengan jaminan sebanyak 80% ke atas pembiayaan bagi modal kerja syarikat. Namun demikian, kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor penerbangan tertakluk kepada syarat-syarat kelayakan yang telah ditetapkan.
2. Walau bagaimanapun, pada masa ini, Kerajaan tidak terlibat dalam apa-apa pelan menyelamatkan (*bail out*) mana-mana syarikat penerbangan komersial termasuk memberi pinjaman atau jaminan selaras dengan kenyataan akhbar yang dikeluarkan oleh Kementerian Kewangan pada 13 Oktober 2020.
3. Bagi mengatasi masalah kewangan Malaysia Airlines Berhad (MAB), Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATO' SERI DR. SHAHIDAN BIN KASSIM
[ARAU]**

TARIKH : 10 DISEMBER 2020 (KHAMIS)

SOALAN

DATO' SERI DR. SHAHIDAN BIN KASSIM [ARAU] minta **MENTERI KEWANGAN** menyatakan:-

- (a) adakah pihak Kerajaan berhasrat melanjutkan moratorium yang dilihat akan memberi kesan yang positif kepada pembangunan pemulihan ekonomi rakyat bagi menghadapi situasi COVID-19; dan
- (b) sejauh manakah bantuan makanan yang diberikan oleh kerajaan terhadap kawasan PKPB dan PKPDB tiba pada waktu ditetapkan.

JAWAPAN

Tuan Yang Di-Pertua,

1. Sejar dengan pembukaan semula hampir keseluruhan sektor ekonomi dan seperti yang telah diumumkan dalam Belanjawan 2021, kecuali bagi PKS yang mempunyai pinjaman tidak melebihi RM150,000 dan kumpulan B40, moratorium kini dilaksanakan secara bersasar kepada golongan yang terjejas sepanjang tahun 2020 sehingga tahun 2021.
2. Kementerian Pembangunan Wanita, Keluarga dan Masyarakat atau (KPWKM) merupakan satu daripada kementerian di bawah kategori *frontliner* yang bertanggungjawab membantu rakyat yang terkesan akibat

daripada pelaksanaan Perintah Kawalan Pergerakan atau (PKP). KPWKM melalui Jabatan Kebajikan Masyarakat atau (JKM) telah dipertanggungjawab untuk menguruskan pemberian bantuan bakul makanan kepada masyarakat yang terkesan akibat COVID-19 ini.

3. Secara keseluruhannya peruntukan sebanyak RM47.42 juta telah diberikan kepada KPWKM untuk membuat agihan bakul makanan kepada masyarakat yang terkesan dengan pelaksanaan PKP ini. Sehingga kini, JKM telah mengagihkan bakul makanan kepada seramai 820,723 Ketua Isi Rumah dan memanfaatkan 3.2 juta Ahli Isi Rumah di seluruh negara. Selepas pelaksanaan PKP, Kerajaan telah melaksanakan Perintah Kawalan Pergerakan Diperketatkan atau (PKPD) dan Perintah Kawalan Pergerakan Bersasar atau (PKPB) di beberapa kawasan tertentu yang mempunyai kes positif COVID-19 yang tinggi.

Tuan Yang Di-Pertua,

4. Pengagihan bakul makanan bagi kawasan PKPD dan PKPB diletakkan di bawah Majlis Keselamatan Negara melalui Jawatankuasa Pengurusan Bencana Negeri dan Daerah. Pengagihan berkenaan bagi kawasan tersebut dibuat dengan kerjasama pelbagai agensi di bawah Jawatankuasa Bencana untuk memastikan bakul makanan sampai kepada kumpulan sasar tepat pada masanya. Penyelarasan pada peringkat daerah akan dibuat oleh Pegawai Daerah selaku Pengerusi Jawatankuasa Pengurusan Bencana Daerah. Kerjasama pelbagai agensi di bawah jawatankuasa ini akan dapat memastikan bekalan makanan sampai kepada penduduk dengan cepat dan lebih efisien.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 10 DISEMBER 2020 (KHAMIS)

SOALAN

Minta **MENTERI PENDIDIKAN** menyatakan apakah program telah di laksanakan (ekonomi, sosial dan mental) untuk pelajar berkeperluan khas (seperti Autism Spectrum Disorder), terutamanya dari B40, pada semasa dan selepas tamat sekolah kebangsaan.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam memastikan semua murid, termasuk murid berkeperluan khas (MBK) mendapat akses kepada pendidikan secara optimum. KPM memberi perhatian kepada semua MBK yang terdiri daripada pelbagai latar belakang sosioekonomi.

Berdasarkan Peraturan-Peraturan Pendidikan (Pendidikan Khas) 2013, terdapat enam kategori MBK iaitu:

- 1) ketidakupayaan penglihatan;
- 2) ketidakupayaan pendengaran;
- 3) ketidakupayaan fizikal;
- 4) ketidakupayaan pertuturan;
- 5) masalah pembelajaran; atau

- 6) mana-mana kombinasi ketidakupayaan atau ketidakupayaan dan masalah, yang disebut dalam perenggan (1) hingga (5).

Untuk makluman Ahli Yang Berhormat, KPM menyediakan keperluan pendidikan khas di semua peringkat persekolahan iaitu prasekolah, rendah, menengah dan lepas menengah. Terdapat tiga pilihan persekolah untuk MBK, sama ada di sekolah pendidikan khas (SPK), Program Pendidikan Khas Integrasi (PPKI) atau Program Pendidikan Inklusif (PPI). PPKI dan PPI adalah program pendidikan khas yang dilaksanakan di sekolah arus perdana.

Dalam aspek kurikulum, mengikut Peraturan-Peraturan Pendidikan (Pendidikan Khas) 2013, MBK boleh mengikuti kurikulum seperti yang berikut:

- 1) Kurikulum Kebangsaan;
- 2) Kurikulum Kebangsaan yang diubah suai;
- 3) Kurikulum yang dibina khusus; dan/atau
- 4) Kurikulum Latihan Kemahiran.

Manakala, bagi MBK yang belum dapat mengikuti kurikulum kebangsaan, KPM telah menyediakan kurikulum yang dibina khusus bagi MBK iaitu:

- 1) Kurikulum Standard Prasekolah Pendidikan Khas;
- 2) Kurikulum Standard Sekolah Rendah Pendidikan Khas; dan
- 3) Kurikulum Standard Sekolah Menengah Pendidikan Khas.

Selain itu, KPM turut menyediakan peluang kepada murid MBK untuk mengikuti pembelajaran dalam aliran kemahiran di peringkat sekolah menengah sama ada di Sekolah Menengah Pendidikan Khas Vokasional (SMPKV), Sekolah Menengah Kebangsaan Pendidikan Khas (SMKPK) Persekutuan, Kolej Vokasional atau di PPKI. Bagi MBK di SMPKV, terdapat empat buah sekolah menawarkan program Pendidikan dan Latihan Teknikal dan Vokasional (TVET) yang bersesuaian dengan Sijil Kemahiran Malaysia sehingga Tahap 3.

Di samping itu, Sekolah Menengah Kebangsaan yang mempunyai PPKI turut menawarkan program TVET dengan persijilan modular dan SKM kepada MBK agar mereka juga mempunyai kemahiran vokasional sebagai persediaan memasuki alam pekerjaan selepas tamat persekolahan. Untuk makluman Ahli Yang Berhormat, KPM juga menyediakan program dan bantuan khusus kepada MBK dari aspek ekonomi, sosial dan mental bagi membantu meningkatkan potensi MBK. Di antara program dan bantuan khusus yang diberikan kepada MBK ialah :

- 1) keistimewaan melanjutkan tempoh pendidikan sama ada:
 - a. tidak lebih daripada dua tahun di sekolah rendah;
 - b. tidak lebih daripada dua tahun di sekolah menengah; atau
 - c. satu tahun di sekolah rendah dan satu tahun di sekolah menengah.
- 2) tambahan satu tahun jika MBK mengikuti pendidikan vokasional di Sekolah Menengah Pendidikan Khas Vokasional (SMPKV);
- 3) bantuan kewangan khusus kepada MBK yang mempunyai kad OKU iaitu Elaun Murid Khas sebanyak RM150.00 setiap bulan;
- 4) tambahan masa semasa menduduki peperiksaan awam;
- 5) bantuan dan sokongan semasa menduduki peperiksaan awam;
- 6) bayaran makanan asrama dikecualikan bagi MBK di asrama sekolah pendidikan khas (SPK);
- 7) Rancangan Makanan Tambahan (RMT) kepada semua MBK di sekolah rendah.
- 8) bantuan peralatan khas seperti sistem *frequency modular* (FM), mesin braille, set *cubarithm*, *slate* dan *stylus*;

NO. SOALAN : 52

- 9) Pembantu Pengurusan Murid (PPM) untuk membantu guru menguruskan MBK dan menyediakan bahan pembelajaran; dan
- 10) Bantuan kepakaran Pusat Perkhidmatan Pendidikan Khas (3PK) dalam aspek khidmat nasihat, intervensi, terapi dan rehabilitasi MBK.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TENGKU ZULPURI BIN RAJA PUJI
[RAUB]**

TARIKH : 10 DISEMBER 2020 (KHAMIS)

SOALAN

Minta **MENTERI TENAGA DAN SUMBER ASLI** menyatakan secara terperinci berapa jumlah hasil pembalakan dan jumlah keluasan hutan diluluskan untuk tujuan pembalakan mengikut negeri semenjak 2015 sehingga 2020.

JAWAPAN

Tuan Yang di-Pertua,

Untuk makluman Ahli Yang Berhormat, hasil yang dikutip sepanjang tempoh tersebut adalah berjumlah RM6.3 bilion. Manakala kawasan yang telah diluluskan untuk pembalakan di Malaysia berdasarkan Catuan Tebangan Tahunan (CTT) dari tahun 2015 hingga 2020 adalah seluas 1,479,059 hektar.

Sekian, terima kasih.